


焦氏筆乘

續集

五之八




				五	漢書門
			三	二	
			八	二	
四	二	六	八	架	函
				架	函

內閣文庫			
三〇七		五	漢
二		三	書
〇架	冊	二	寄
		八	類

內閣文庫	
番號	漢 5328
冊數	4 (4)
函號	307 245

共四本



焦氏筆乘續集卷五

淺草文庫



秣陵焦竑弱侯輯

門人謝與棟吉甫

男焦尊生茂直

校

佛典

佛典世謂漢明帝時始通中國不知明帝之前已有之劉向列仙傳曰歷觀百家之中以相檢驗得仙者百四十六人其七十四人已在佛經霍去病傳收休屠祭天金人顏師古注曰今佛像也是也漢武故事曰昆邪殺休屠王以其衆來降得其金人

之神置之甘泉宮金人皆長丈餘其祭不用牛羊
惟燒香禮拜上使依其國俗祀之魚豢魏略西戎
傳曰哀帝元壽元年博士弟子景盧受大月氏王
使伊存口傳浮屠經此皆明帝以前事也使明帝
前未有佛典傳毅對明帝之言何從而得之但未
盛行如今日耳隋書經籍志云其書久已流布遭
秦之世所以湮滅亦臆說也

周禮注

于寶周禮注曰言司者總其領司會之屬言師者訓其

徒甸師之屬言職者主其業職內之屬言衡者平其政虞衡之屬

言掌者主其事掌合之屬言氏者世其官師氏之屬言人者

終其身庖人之屬不氏不人權其材也宮正膳夫內外饗食之屬

月令

月令篇李濟翁資暇集云今人咸依陸德明所說
是呂氏春秋十二紀之首後人合爲之誤也蓋出
周書第七卷周月時訓兩篇蔡邕玉篇云周公所
作是也呂紀自采於周書則不得言戴禮取諸呂
紀明矣自東風解凍至水澤腹堅後魏始入曆爲

七十二候其所載與夏小正淮南時則訓管子汲冢書互有出入朱文公作儀禮經傳解備引之予又見王冰注素問亦引月令七十二候與今世行呂氏春秋及曆中所載不同如桃始華爲小桃華雷乃發聲下有芍藥榮田鼠化爲鴛下有牡丹華王瓜生作赤箭生苦菜秀作吳葵華麥秋至作小暑至半夏生下有木槿榮蟄蟲坯戶下有景天華惟易通卦驗亦載節候而其書今亡類書所引若條風至而楊柳津景風至而搏勞鳴蝦蟇無聲涼風至而鶴鳴閭闔風至而蜻蛉吟日至而泉躍泉躍卽今水泉動也可考古今節候之異

元宵應制

王岐公作元宵應制詩子厚問公使何事岐公曰黿山鳳輦耳子厚以爲陳言且疑爲所給詩成果用此二事所謂雙鳳雲中扶輦下六黿海上駕山來是也子厚嘆服以爲不可及事雖尋常只是能點化用之便成佳句此可悟作文之法

杜詩如吳道子畫

魚以筆身 卷之五
子瞻云老杜自秦中赴成都所歷輒作一詩數千里山川在人目中古今詩人殆無其比獨明皇遣吳道子傳畫蜀道山川歸對大同殿索其畫無有曰在臣腹中請正素寫之半日都畢明皇后幸蜀皆默識其處無不相合可用爲比子瞻此言可謂善喻以此見古人集當以編季爲正若近世各體爲類此等處無從攷見矣

夷狄名姓異音

冒頓音黑特龜茲音丘慈可汗音榼寒闕支音烟
支谷蠡音綠黎浩豐音誥門番汗音盤寒允吾音
鈇牙先零音銑燐樂浪音洛郎契丹之契音乞敦
煌之敦音屯康居之居音渠月氏之氏音支史傳
具有音切未易悉舉

三商

士昏禮漏下三商爲昏商音滴與夏商之商不同
蘇易簡文三商而眠高春而起用其語也今人多
誤讀

禮不下庶人

禮不下庶人謂酬酢之禮也白虎通德論之說勝諸家

明堂位

明堂位曰成王以周公有勳勞於天下命魯公世祀周公以天子禮樂漢儒魯頌闕宮傳遂緣此以解皇皇上帝皇祖后稷之文程子曰周公之功固大矣皆臣子之分所當爲者魯安得獨用天子禮樂哉成王之賜伯禽之受皆非也其論正矣於事猶未之考也按左傳隱公九年考仲子之宮將萬

壘公問羽數於衆仲對曰天子用八諸侯用六大夫用四士用二公從之於是初獻六羽若魯先公素用八佾則其羽數隱公自能知之何以問於衆仲故春秋於桓五年書曰大雩見大雩之僭始於桓也閔二年書曰禘於莊公見禘之僭始於閔也僖三十一年書曰四卜郊不從見郊之僭始於僖也自伯禽以下十八世皆未有郊社樂歌而獨自僖始則僖以前未有郊社之事而始僭於僖可知矣闕宮首言乃命魯公俾侯於東錫之山川土田

魚以筆身 卷之五
附庸蓋無異典也其下乃言周公之孫莊公之子
以及享祀不忒皇皇后帝皇祖后稷其不出成王
之賜尤爲可證又呂氏春秋魯惠公請郊廟之禮
於周天子使史角往報之使成王果賜周公則惠
公何以復請平王使史角報之蓋未之許也且襄
王之衰猶不許晉文公之請隧謂賢如成王其見
乃出平王襄王下哉

肉孔

璧孔曰肉孔言其美滿也樂音曰肉好言其圓滑
也禮記曲直繁瘠廉肉節奏注或宛轉而曲或徑
出而直或豐而繁或殺而瘠或稜隅而廉或圓滑
而肉或止而節或作而奏

政事疏

賈誼政事疏天下之勢方病大瘡一脛之大幾如
要一指之大幾如股出說苑孔子曰脛大于股者
難以步指大於臂者難以把本小末大不能相使
也履雖鮮不加于首冠至弊不以苴履出戰國策
淳于髡曰狐裘雖弊不可以補黃狗之皮

田子春

陶詩聞有田子春節義為士雄未知所出讀漢書
劉澤傳高后時齊人田生游之資以書干澤澤大
悅之用金二百斤為田生壽田生如長安幸謁者
張卿諷高后立澤為瑯琊王楚漢春秋云田生字
子春乃知即此人耳

子美詩

孫莘老云子美日長唯鳥雀春暖獨柴荆言亂離
有深意也得風雅體以此推之如草黃驥驥病沙
晚鶴鴿寒謂祿薄君子不得志世亂兄弟不相見
也叢篁低地碧高柳半天青謂君子失時小人得
志也

禹舉益

墨子云禹舉益於陰方之中授之以政而九州成
與孟子合符子乃云禹遜天下於奇子奇子曰君
之佐舜勞矣鑿山川通河濟首無髮股無毛故舜
也以勞報子我生而逸不能為子之勞矣此莊休
寓言之流非實錄也

誦北山移文

种明逸真宗時辭歸終南舊隱上命設宴禁中廷臣皆賦詩以寵其行獨翰林學士杜鎬辭以素不習詩但誦北山移文一過明逸不懌云野人焉知大丈夫之出處哉熙寧中王荆公進用有王一介中甫者以詩詆之云草廬三顧動幽蟄蕙帳一空生曉寒荆公不以爲忤但賦絕句云莫向空山覓舊題野人休誦北山移丈夫出處非無意猿鶴從來自不知卽用本朝事入詩中甫三衢人昭陵時

中制科爲從官有名

种明逸詩

明逸詩今無所見小說中得一首漫記之樓臺縹緲路岐傍共說祈真白玉堂株樹風高低絳節靈臺香冷醮虛皇名傳六合何昭晰事隔三清恨渺茫欲識當年漢家意竹宮梧殿共淒涼是詠時事而作

句讀

學者有讀書終身不知句讀者由少年不經師匠

因仍至此余童子時聞部使者臨學宮講論語諸
生誦點爾何如至點字作一讀使者動色嘉嘆蓋
人多忽此故耳嘗觀李彥平讀禮記男女不雜
坐不同句施枷不同句巾櫛不親授句程伯淳讀
孟子至大至剛以直句養而無害則塞於天地之
間姚寬讀左氏春秋故講事以度軌句量謂之軌
取材以章物句采謂之物又聞晉公子駢脅欲觀
其裸浴句薄而觀之費補之讀漢書衛青傳人
奴之句生得無咎罵即足矣楊用修讀史記高祖

與父老約句法三章耳皆妙得古人之旨是正沿
承之誤其他經籍所具余略條一二俟學者以類
推之如莊子涇流之大兩涘渚涯之間不辨牛馬
當涇流之大一讀而林希逸以涇流之大兩涘為
句史記封禪書八神一曰天主祠天齊二曰地主
祠泰山梁父觀後天子至梁父禮祠地主之文則
八神名當至主字句絕而用脩允寧皆一曰天二
曰地為句季布傳身屢典軍塞旗者數矣九字一
句而索隱身屢典軍為句匈奴傳務調納其說以

便偏指不參彼已句絕而索隱以偏指不參為句
律書雖妙必效情句核其華道者明矣而用修引
之作情核其華為句魏豹彭越傳其雲蒸龍變欲
有所會其度句絕言欲遭時行志與所蘊適相際
也如云此足下度內耳可證而用修其度以故為
句谷永傳成帝數為微行多近幸小臣句絕趙李
從微賤專寵皆皇太后與諸舅夙夜所常憂而用
修元美皆讀云小臣趙李從微賤專寵此類未可
悉數

譌字

替篆文作普與普相近竝下日為普浦竝下白為
普刺郭知玄曰白頭秭苑不知普普之分青衿小
生焉辨商商之別又柳豫大藏音序反悞則巾小
不分擿槐則才木不辨書生傳寫破體者多對讀
支離辨正者少

樂天逸詩

宋王彥國獻臣招信人居縣之近郊建炎初虜將
渡淮獻臣坐所居小樓望見一士夫徬徨阡陌間

攜小僕負一匣埋於僻處獻臣默識之事定往掘其處宛然尚存啟匣乃白樂天手書詩一紙云石榴枝上花千朵荷葉杯中酒十分滿院弟兄皆痛飲就中大戶不如君真奇物也今人謂能豪飲者爲大戶樂天詩屢用之此詩集中不載見宋人小說輟錄於此

龜山不輕解易

吳容律勸龜山解易荅曰易難解如乾坤兩卦聖人嘗釋其義於後是解易之法也初九潛龍勿用

釋云陽在下也又曰龍德而隱者也又曰下也又曰陽氣潛藏又曰隱而未見行而未成此一爻耳反覆推明至五變其說然後已今人於他卦能如是推明乎若不能則一爻之義只可用之一事易三百八十四爻爻指一事是其用止三百八十四事而已易之理果極于此乎若三百八十四事不足以盡之則一爻之用不止一事明矣觀聖人於繫辭發明卦義尚多其說果如今之解易者乎嘗謂說易須髣髴聖人之意然後可以下筆此其所

以未敢苟也

孔子無所不佩

王叔師楚騷注曰行清潔者佩芳德明光者佩玉能解結者佩觿能決疑者佩玦故孔子無所不佩也

琵琶番蒲司帆作仄聲

唐詩四弦不似琵琶聲又斷腸猶繫琵琶弦又銀合鑿落殘金屑琵琶槽是琵琶之琵琶作第四聲讀也杜詩會須上番看成竹獨孤及詩近日霜毛一

番新番音飯樂天詩羌管吹楊柳燕姬酌蒲桃燭淚連盤壘蒲桃蒲音浦又四十着緋軍司馬男兒官職未蹉跎一為州司馬三見歲重陽司音伺選詩無因下征帆子美浦帆晨初發退之無因帆江水孟襄陽嶺北迴征帆巴東問故人帆音梵此等尚多周子充跋文苑英華云切磋之磋馳驅之驅挂帆之帆仙裝之裝廣韻各有仄音而流俗資切磋為效課以駐易驅以席易帆以仗易裝今皆正之

一物數名

蟋蟀一名蜻蛚又名寒蛩莎雞促織薊子一歲名
 烏喙二歲名附子三歲名烏頭四歲名天雄廣韻
 枸杞春名天精子夏名枸杞葉秋名却老枝冬名
 地骨皮爾雅芙蓉其花芙蓉其莖菡萏其根藕其
 莖茄其葉荷其本蕊其實蓮其中葯葯中意以子
 名曰蓮華以葉名曰荷華以根名曰藕華在陸生
 秋華者名木芙蓉

蟠桃核

宋學士有蟠桃核賦核長五寸廣四寸七分前刻
 西王母賜漢武桃及宣和殿十字塗以金今藏大
 內可謂甚異然洽聞記言吐谷渾桃大如六斤甕
 意卽此也宋王黼盛時廣求四方瓌奇之物有以
 桃核半枚獻者中容米四三斗其間題詠之字滿
 矣李端叔題云觀此桃則退之所謂華山十丈蓮
 信有之矣今御府核亦多古人題字

鸞桃

櫻桃亦曰鸞桃呂氏春秋羞以含桃先薦寢廟注

云含桃鷲桃也鷲所含食故曰含桃鷲桃二字甚
新前人所未用

劉歆顏游秦

葛洪云洪家世有劉子駿漢書百卷歆欲撰漢書
編錄漢事未得締構而亡故書無宗本止雜記而
已班固所保殆是全取劉書有小異同耳固所不
取不過二萬許言顏游秦師古之叔也撰漢書決
疑十二卷時稱爲大顏後師古爲太子承乾注書
多取其義是二公有功於漢書多矣今人知班固
師古而已若歆與游秦不知也唐史師古傳略載
游秦事而不詳語具顏魯公集中

阿堵

史言王衍口不言錢家人欲試之以錢繞牀不能
行但云舉却阿堵物世遂以阿堵爲錢矣然顧凱
之言傳神寫照正在阿堵中殷浩見佛經云理亦
應阿堵上桓溫止新亭大陳兵衛呼謝安王坦之
欲於坐害之謝目衛士曰安聞諸侯有道守在四
鄰明公何須壁間置阿堵輩一以爲眼一以爲經

一以為兵士豈可指定言之阿堵自是當時諺語如今所謂此物云耳

寧馨

寧馨猶言恁的也如阿堵皆虛活字山濤見王衍曰何物老嫗生寧馨兒至宋廢帝悖逆太后怒語侍者曰將刀來剖我腹那得生寧馨兒若不見宋太后語當以寧馨為美詞矣

犧樽

周禮小宗伯辨六罇之名物以待祭祀賓客謂犧象著壺太山六罇是也明堂位犧象周罇三禮圖畫爨形刻劃犧象于其上此鄙儒未見其器妄想圖形謹按博古圖作牛形背上開竅以注酒曰犧罇如象形者曰象罇據此可證三禮圖之謬

穀璧

周禮典瑞子執穀璧男執蒲璧皆五寸三禮圖穀璧畫禾莖之狀蒲璧圖蕭葦之形此亦以意度妄作如犧罇象罇之誤蓋穀璧圓瑒拱起狀如粟粒蒲璧畛畫細文形似蒲華即今二璧多有存者世

儒莫辯

黼辰

明堂位天子負黼辰南向而立注狀如屏風高八尺東西當戶牖之間因爾雅斧謂之黼俗遂謬用斧依如匍匐謬用蒲伏狹豸謬用窳窳之類三禮圖傳會其說作屏障畫十二斧于其上取剛斷之義謹按禮書白與黑間為黼辰則屏障畫黼文于其上取分辨昭彰之義無疑矣今時市幌以黑白相間即黼文之遺制

內則

禮記內則肉腥細者為膾大者為軒稽攷軒字乃幹之訛按儀禮特牲饋食佐食舉幹注牲肉長脇也可以為證

祭法

禮記祭法雩宗祭水旱幽宗祭星稽攷宗當作崇說文崇音咏設緜蒞為營于日月星辰山川之壇以禳風雨雪霜水旱厲疫

師卦

周易師卦以此毒天下之民而民從之朱子注毒害也凡有害于民則民弗從說文毒音篤訓生厚也从生母會意毒音獨傷害也从艸諧毒音二字音義皆有別

木鐸

論語天將以夫子為木鐸朱子注木鐸金口木舌稽攷木鐸金鐸各有所用不以舌為分釋名文事振木鐸武事振金鐸周禮鼓人以金鐸通鼓鄉師以木鐸徇于市朝古者木鐸木口大舌金鐸金口金舌若以金口木舌為木鐸然則木口金舌為金鐸可乎

寤生

左傳莊公寤生驚姜氏杜預注寤生難產也不言其詳據文理寤當作迨音同而字訛迨者逆也凡婦人產子首先出者為順足先出者為逆莊公蓋逆生所以驚姜氏以上八則吳元滿說

聯字

俗於聯字有因上誤下者有因下誤上者駟僧誤

以僧从馬作騎髻亂誤以髻从齒作齧蹴鞠誤以
鞠从足作踞此類甚多皆一時趁筆之誤後多泐
其失而不攷耳

种英蘇冠

盧多遜當國門下士最多其所器重者种英蘇冠
二人而已後多遜得罪賓客皆散去獨英冠二人
徒步送之千里而還英後改名放即明逸冠改名
易簡魁天下仕至參知政事近日嚴介溪罷相平
日知交無一人至者羅先生汝亨歎曰公當國吾
鄉人孰不沾其餘潤一旦皆舍去太不成模樣矣
因日往視之然先生當嚴氏盛時實未嘗與相周
旋也先生器識自學問中來又非前二人比

尚書多言時

楊慈湖言書疇咨若時登庸勅天之命惟時惟幾
庶頑讒說若不在時率以時爲是蓋古語也曰誰
乎嗟哉有誰順是者乎吾將登庸之蓋時即道也
舜之所以光天之下者此也黎獻所以有功者此
也舟楫反此也禹荒度土功用此也臯陶祗叙叙

此也祖考以此而格羣后以此而讓鳳凰因此而來百獸以此而舞庶尹由此而諧勅正天命惟此而已惟此爲幾謂爲庶政之幾蓋天下惟有此道而已得此則吉則治失此則凶則亂唐虞君臣朝夕之所謀謨無出此道故當時相與詔告惟曰時猶曰此也時卽道之異名此非言意所能名後乃強名曰道取道路無所不通之義初無形體可執至於曰時則尤不滯于言意妙哉時之爲言非大聖疇能名之易多曰此此卽時也漆雕開曰吾斯之未能信斯亦時也帝知若時者誠未易得故問其次誰能順予事者米事也次問事則知時爲道無疑

媵

媵說文送也史載湯壻有莘以伊尹爲媵送女故稱有莘媵臣楚辭魚鱗鱗兮媵予爾雅亦云媵將送也卽不指爲妾今攷公子結媵陳人之婦于鄆及魯其姬嫁于宋而衛與齊晉三國來媵傳云媵淺事也胡氏引公羊謂諸侯有三歸嫡夫人行則

姪娣從二國來媵亦以姪娣從凡一娶九女所以廣繼嗣三國來媵非禮也遂以爲從嫁之女夫魯與衛敵而晉盟主齊大國也共姬雖賢其肯以姪娣爲妾以承事之如傳之言則伊尹爲媵送女與魚之媵予亦謂之妾可乎至于江有汜之詩注因以爲美媵釋名又附益之以姪娣曰媵謂媵承也承事適也今二品曰姬五品曰媵以陳人之婦與三國之于共姬可若是儼乎

送琉球生詩

樂天題岳陽樓春岍綠時連夢澤夕波紅處近長安張芸叟用之爲詞回首夕陽紅盡處應是長安人喜誦之不知實出樂天也友人王元善送琉球生歸國詩風卷晴沙送客歸片帆南去疾於飛春濤萬里重回首紅日中天是帝畿尊中國最得體雖語類前人而氣韻則勝之矣

小學

杜鄴子夏尤長小學小學謂文字之學也周禮八歲入小學保氏教國子以六書故名鄴子林好古

有雅才建武中歷位列卿至大司空其正文字過
於鄴故言小學者宗於杜林三蒼蒼頡篇秦相李
斯作訓纂篇楊雄作僖喜篇後漢郎中賈魴作總
曰三蒼梁有蒼頡二卷杜林注見隋經籍志又小
學篇一卷晉下邳內史王義撰又少學九篇楊方
撰始字一卷勸學一卷蔡邕撰司馬相如作凡將
篇班固太甲篇在昔篇崔瑗飛龍篇蔡邕聖皇篇
黃初篇吳章篇蔡邕女史篇合八卷又初學二卷
朱育撰始學十二卷吳郎中項峻撰又月儀十二
卷亡發蒙記一卷晉著作佐郎束皙撰張挹字詒
漢張衡傳注有蒼頡篇漢安紀注云蒼頡篇云邨
舍也又曰帝年十歲好學史書注云史書周宣王
太史籀所作之書也凡五十五篇以教童蒙魏王
粲傳云邯鄲淳博學有才章善蒼雅蟲篆通典云
漢官儀云能通蒼頡史籀篇補蘭臺令史滿歲爲
尚書郎法言學蒼頡史篇注謂多知奇難字三蒼
訓詁三卷埤蒼二卷竝張挹撰廣蒼一卷樊恭撰
見唐經籍志又有氏字指何承天纂文郭璞三蒼

解話

明駝

木蘭辭願馳千里明駝足送兒還故鄉駝臥腹不帖地屈足漏明則走千里故曰明駝唐制驛置有明駝使非邊塞軍機不得擅發又後魏書高祖不飲洛水常以千里足明駝更互回恒州取水供贍據此則取水數千里外不始於李贊皇矣

用晉人語入聲律

晉人語一入聲律無不精妙右軍帖云奉橘三百枚霜未降未可多得韋蘇州用之爲詩憐君臥病思新橘試摘才酸亦未黃書後欲題三百顆洞庭須待滿林霜渾化無跡如自作語耳一帖寒食近得且住爲佳耳辛幼安玉蝴蝶辭試聽呵寒食近也且住爲佳又霜天曉角明日落花寒食得且住爲佳耳凡兩用之當是絕愛其語

五大夫

秦始皇下泰山風雨暴至休於樹下因封其樹爲五大夫初未言爲何樹也應邵作漢官儀始言爲

松松在泰山小天門至邵時猶存故邵知之耳五大夫秦爵第九級如曹參賜爵七大夫遷爲五大夫是也唐人松詩有不羨五株封之句其誤已甚紹興上虞縣有村市曰五大夫故老云有焦氏墓於此後五子位皆至大夫因而得名不知者附會其說曰此秦封松爲五大夫之地也時王梅溪爲郡幕采所聞爲會稽風俗賦得此遂以爲實然故賦有楓挺千丈松封五夫之語且疏云上虞地名五大夫乃始皇封松爲五大夫處蓋越人但知始皇嘗上會稽刻石頌德不知封松乃在泰山非會稽也而梅溪復失於審諦公襲其誤至此張湜云予嘗過其處見道旁古石塔有刻字尚可讀乃會昌三年所記云草市五大夫因焦氏立塋於此孝感上聖而立名焉據此不獨可正王之謬亦備吾家一事因具錄之

假借相反字

吳元滿云容齋隨筆載字有假借相反者如臭本腐氣反借香也擾本煩雜反借馴也亂本繁紊反

借治也楊用脩丹鉛錄亦述之不知此六字皆有
分別臭音休與嗅同以鼻檻氣也荀子嗅之而無
嫌於鼻从自犬會意借凡氣之總名香朽羶腥焦
謂之五嗅又香也內則皆佩容臭煖音醜腐氣也
水潤下其氣煖曹植書海畔有逐煖之夫从皮諧
臭音擾音統煩襍也胤征俶擾天紀从手憂上音
俗訛作擾擾音繞馴也說文牛柔謹也職方氏豫
州其畜宜六擾从牛憂音亂音鑿紊也煩擾也史
記猶治亂繩古作變从絲下指交結之狀嗣音維
理效也平治也盤庚嗣越我家論語予有嗣臣十
人从司爵會意現石鼓文及宰辟父敢隸楷用治
洪楊二公不知六書故有此誤

史記呂氏春秋之異

史記吳起傳魏置相相田文吳起不悅謂田文曰
請與子論功可乎田文曰可起曰將三軍使士卒
樂死敵國不敢謀子孰與起文曰不如子起曰治
百官親萬民實府庫子孰與起文曰不如子起曰
守西河而秦兵不敢東鄉韓趙賓從子孰與起文

曰不如子起曰此三者子皆出吾下而位加吾上何也文曰主少國疑大臣未附百姓不信方是之時屬之於子乎屬之於我乎起默然良久曰屬之子矣呂氏春秋載吳起謂商文曰事君果有命矣夫商文曰何謂也吳起曰治四境之內成馴教變習俗使君臣有義父子有序子與我孰賢商文曰吾不若子曰今日置質爲臣其主安重今日釋璽辭官其主安輕子與我孰賢商文曰吾不若子曰士馬成列馬與人敵人在馬前援桴一鼓使三軍

之士樂死若生子與我孰賢商文曰吾不若子吳起曰三者子皆不吾若也位則在吾上命也夫事君商文曰善子問我我亦問子世變主少羣臣相疑黔首不定屬之子乎屬之我乎吳起默然不對少選曰與子夫二書所載卽一事耳史記稱田文呂紀爲商文所不可曉太史公得于傳聞而呂紀先秦之書或于紀載爲覈

孟舒魏尚

孟舒與魏尚皆以文帝時爲雲中守皆坐匈奴入

寇得罪皆得士死力皆用他人言復官事豈有相類如此者當是一事而傳聞異詞史因以為兩人耳

通鑑之誤

通鑑載唐太宗臂佳鵠望見魏徵納之懷徵奏事久不已鵠竟死懷中按白樂天獻續虞人箴云降及宋璟亦諫玄宗溫顏聽納獻替從容及璟趨出鵠斃握中故開元事播于無窮則是宋璟諫明皇非徵與太宗也樂天去當時未遠必有据依今唐

書徵列傳亦不載此事

左氏史記之異

左氏不載程嬰公孫杵臼存趙事而史記言之甚詳左氏稱趙武從姬氏畜於公宮以其田與祈奚韓厥言於晉侯曰成季之勳宣孟之忠而無後為善者懼矣乃立武而反其田是無嬰與杵臼事也史記則言晉滅趙之族朔妻成公姊有遺腹匿公宮生武公孫杵臼程嬰以死存之越十五年因韓厥得復田邑二說似乎不一蓋左氏為文高簡且

其所載以立武復田爲重故詳序其後而不暇悉其初然謂趙武從姬氏畜于公宮則所謂朔妻匿於公宮與武之生及二子之存孤可一語盡之矣史記追叙本末故詳著焉二說固可會而一也趙之族滅左氏謂趙嬰齊通於莊姬原屏放之於齊莊姬以是怨原屏譖而殺之而趙氏滅史記則謂大夫屠岸賈討靈公之賊殺朔與嬰齊同括而趙氏滅二說不同合二書考之蓋趙朔趙同趙括之死本各因一事各爲一時史記誤合爲一遂致事

詞參錯不可稽耳今按趙同於朔死之後見於左氏者不一而足其非同時被殺甚明且趙世家載晉景公三年屠岸賈攻趙氏於下宮殺趙朔趙同趙括趙嬰齊皆滅其族晉世家則載景公十二年以趙括與韓厥等五人爲卿已自相抵牾不足信矣

石鼎聯句

退之石鼎聯句詩有道士軒轅彌明其語往往高古出羣或者謂卽退之所撰特駕言于彌明耳今

按張南軒淳熙間守靜江奏疏有曰臣所領州有唐帝祠去城二十里而近其山曰堯山高廣為一境之望祠雖不詳所始然有唐衡岳道士彌明詩刻據此則石鼎聯句者可謂無其人邪

舉人籍

唐人舉及第開檢無籍者不得與第其法甚嚴有陳章甫制策登科吏部榜放章甫上書云戶部報無籍記者斥昔傳說無姓殷后置於鹽梅之地屠羊隱名楚王延以三旌之位未聞徵籍也范睢改

姓易名為張祿先生秦用之以霸張良為韓報仇變姓名而遊下邳漢用之為相則知籍者所以計租賦耳本防羣小不約賢路若人大才不可以籍棄之苟無其德雖籍何為今員外吹毛求瑕務在駁放則小人也却尋歸路策藜杖著草衣田園荒蕪鋤犁尚在所司不能奪特咨執政收之天下稱美焉

獻書

唐時科目甚多常舉外復有通五經一史及進獻

文章并上著述之例或付本司或付中書考試亦同制舉開元中有唐頻獻啟典一百三十卷穆元林上洪範外傳十卷李鎮上注史記一百三十卷史記義林二十卷辛之諤上叙訓二卷卞長福上續文選三十卷馮中庸上政事錄十卷高嶠上注後漢書九十五卷如此者并量事授官或霑賞賚若今時用其例尚可得實學者用之豈不勝舉業之流萬倍

說文引經之異

說文引五經文字與今多不同如易服牛乘馬服作備百穀草木麗乎土作麗於地亢龍有悔亢作恍再三瀆瀆作黷其牛掣掣作齧豐其屋豐作豐允升大吉允作執包荒荒作沍為的顙的作馱書宅岵夷岵作岵鳥獸毳毛作廢毛五品不遜遜作遜娶于塗山塗作念彌成五服彌作邛方鳩孳功方鳩作旁速藻火粉米藻作璪碁三百有六句碁作碁剛而塞塞作塞竄三苗于三危竄作竄今汝聒聒作慙慙庶草繁廡廡作無若藥不瞑眩瞑作

眇尚桓桓作狃狃藝倫攸斲斲作殫顛木之有由
藥由藥作皂枿詩新臺有泚泚作玼併之磬矣磬
作室嘽嘽駱馬嘽作疼鉤膺鏤錫錫作錫白鳥鶴
鶴作嚮嚮可以攻玉作可以爲厝衣裳楚楚作
黼墻有茨茨作薺綠竹猗猗綠作菴無然泄泄泄
作咄挑兮達兮挑作岌如此之類不可勝舉是時
五經皆古文未變隸書慎當得其真此後字書又
有玉篇廣韻類篇集韻等出采摭日繁雅俗兼載
讀者迷其本始以說文所述告之未有不賦以爲

異者也

立碑

唐人在官有善政去任後立碑頌德須審詳事實
州司以狀聞奏恩勅聽許然後得建國朝無聞奏
之例然見任官輒自立碑見於律條其禁甚嚴近
日有司身方在官諷動羣小外托辭讓密相督責
甚可耻也開元中右相李林甫先爲國子司業頗
振綱紀洎登廟堂見人好說司業時事諸生希旨
相率署名建碑於國學都堂之前後釋奠日百寮

畢集林甫見碑問之祭酒班景倩具以事對林甫感然曰林甫何功而立碑誰爲此舉意氣甚厲諸生大懼得罪通夜磨滅覆之於南廊林甫何人其羞惡之心猶有存者今之不如林甫者抑又多矣

荆蠻

史記太伯逃之荆蠻考其所都實今蘇常在禹貢古揚州域何謂荆蠻蓋古者中國亦有夷狄如徐戎淮夷之類徐戎非徐卽戎也戎而處於徐者也淮夷非淮卽夷也夷而處於淮者也則知荆蠻亦

蠻之處於荆者或嘗徙于吳太伯至其所徙之地耳吳卽揚之一隅宣王命方叔伐楚詩曰蠢爾蠻荆王子朝奔楚使告諸侯亦曰竄在荆蠻則荆蠻非揚州之產明矣或曰春秋夷吳楚何歟曰春秋夷吳楚以其僭王也夷其道夷其人非夷其地也其地固聖賢之封國禮樂衣冠所從出胡可夷也

東南西北

史記六國表作事者必於東南收功實者常於西北故禹興於西羌湯起於亳周之王也以豐鎬伐

殷秦之帝用雍州興漢之興自蜀漢此亦自遷以前論之耳陳仁子曰六國之興滅亦天運耳地固無常利也黃帝邑於涿鹿顓帝邑於龍城舜耕於歷山王氣在東千五百年乃轉而西西土者自文武都豐鎬以來秦據咸陽漢卜長安王氣在西又千有一百年乃轉而河朔河朔者自西漢中葉以後新莽而下極於隋唐河朔富盛王氣在河朔又九百年乃轉而南夏若南夏者襄漢以南達於湖廣極於閩海安史之亂皆禍所不及歷五季以至宋民物豐阜皆古所號荒涼之地也自南自北盛衰有時遷謂起事專在東南成功專在西北非篤論矣

魚龍畏鐵

封氏記言寶應中海州堰破水涸差東海令李知遠修之堰將成輒壞如此者數四用費過多知遠甚憂之或說梁築浮山堰頻有缺壞以鐵數萬斤積其下堰乃成知遠依其言而穴其塞初堰之將壞也聞其下殷如雷聲至是其聲移上流數里蓋

金鐵味辛能害目蛟龍避之而去故堰可成耳郎
中程皓家在相州宅前有小池有人造劍於池內
淬之池魚皆死以此知魚龍皆畏鐵也天順中徐
公有貞治河張秋苦堤善潰用一老僧言以鐵鎮
之功輒就人以僧爲神不知前時已有此矣

秦會稽刻

史記秦二世東行郡縣到碣石竝海南至會稽丞
相斯等請具刻詔書刻石因明白矣然不載其詞
今記於此皇帝立國維初在昔嗣世稱王討伐亂

逆威動四極武義直方戎臣奉詔經時不久滅六
暴強廿有六年上薦高號孝道顯明旣獻泰成乃
降專惠親巡遠方登於嶧山羣臣從者咸思攸長
追念亂世分土建邦以開事理攻戰日作流血於
野自太古始世無萬數阨及五帝莫能禁止乃今
皇帝一家天下兵不復起災害滅除黔首康定利
澤長久羣臣誦略刻此樂石以著經紀

子見南子

孫季昭曰史記謂孔子見衛靈公之寵姬南子非

也家語曰孔子適衛子驕爲僕靈公與夫人南子同車出令宦者雍梁驂乘使孔子爲次乘遊於市孔子耻之夫聖人方以季桓子受齊女樂而去魯適衛至衛而耻爲靈公南子之次乘豈肯輕身往見之南子者蓋魯之南蒯耳何以知之以佛盼召子欲往而知之也佛盼以中牟叛子路不欲其往夫子有吾豈匏瓜之喻南蒯以費畔子路亦不悅其見二事正同昭公十四年南蒯奔齊侍飲於景公公曰叛夫對曰臣欲張公室也南蒯欲弱季氏而張公室夫子見之將以興魯也與見佛盼事不約而合故知其非見衛之南子而見魯之南子必矣

星宿

二十八宿之宿韻略宿音秀今俗多作此讀誤也宿是日月五星之次舍以止宿爲義陰符天發殺機移星易宿地發殺機龍蛇起陸又古語知星宿衣不覆宿與陸覆爲韻則可見矣亢音剛氏音低觜音訾亦誤爾雅壽星角亢也注云數起角亢列

宿之長有高亢之義不音剛爾雅天根氏也注云角亢下繫於氏若木之有根如周禮四圭有邸漢書諸侯王邸之邸不音低西方白虎而參觜為虎首有觜之義不音訾世多從韻略則不考之過耳

焦氏筆乘續集卷之六

秣陵焦竑弱侯輯

門人謝與棟吉甫

男焦尊生茂直

校

物名

莫邪作寶劍而名劍曰莫邪劉白墮善釀酒而名酒曰白墮潘州郭使君療小兒常用一藥醫家名曰使君子人牽牛來易藥因名其藥曰牽牛青雀盜食脂膏而名竊脂阮咸作銅器似琵琶又易以木名琵琶為阮咸諸葛孔明教士卒種蔓菁因名

諸葛菜僂句之地出龜則名龜曰僂句蔡地出龜則名龜曰蔡冀北出馬則名馬曰驥衛地出驢則名驢曰衛以至鄭國渠劉氏冠謝公墩萊公竹皆此類耳

居第

宋王宣徽君貺年二十七為正字即起第洛中至年八十位兩府盡其財力終身而宅不成子早歿惟一孫與其姪居之不能充一隅也竟未完而壞富鄭公亦起大第無子族子紹庭居之紹庭又無

子唐封氏記言郭令公方築室偶出門語人曰築須盡力令墻堅匠釋鋪而對曰京師貴人墻皆某所築數十年來但見人物更換墻固亡恙也令公聞之恍然意悟因固請辭位近余鄉徐子仁以詩酒自豪築快園求礎石未至令以木代或曰木不堅豈可用之徐笑曰固知其不堅然堅於徐子仁也至今人賞其達云

俗書之誤

俗書蟲字作虫不知虫乃音虺須字作湏不知湏

乃音類船字作舡不知舡乃音航商字作商不知商乃音滴蠶字作蚕不知蚕乃音膳美字作美不知美卽是羔无字作无不知无卽是既本字作本不知本乃音滔盼字作盼不知盼音糸圖字作畱不知畱音鄙趨字作趨不知趨音馳如此之類未易悉舉至如暴已從日又加日而爲曝然已從火又加火而爲燃岡之崗芻之芻昏之昏女之汝芻之掬與之歟回之迴果之菓席之蓆架屋疊牀觸日皆是而字學埽地矣

范質

宋建隆初春宴雨大作樂舞皆失容上色愠范質乃言曰今歲二麥必倍收上聞之喜動顏色命滿泛入夜方罷莫不霑醉所謂宜在帝左右者斯人也

尼善應

偶得鬼董五卷中載尼善應者貌寢陋鄙樸人也晚忽得定慧嘗以錢托魯文之僉憲買牒與侍童以居魯氏婢有盜帑帛者妄連其童尉捕之應曰

童何知我乃得盜狀盜天地之和盜日月之明盜衣食於桑麻穀粟盜資用於水火木土金盜骨肉精血於父母人孰非盜而獨此婢邪尉曰然則若所自有者何應曰性也吾與官同亦與羣卒同與盜婢同知本有之性則前所謂盜者亦皆吾性之有而非真盜矣羣卒不知謂爲侮已虐之甚苦至焚艾火熏灼之應笑曰此非我也我出空劫前入空劫後諸佛慧眼尚不能窺况汝曹邪卒暴不得施乃舍去一日侍童扣魯之門曰吾師亡矣魚背視之儼然坐脫移寔他榻坐益堅面淡紅色翼日闍維舍利溢出烟所泊林莽皆垂雜五色珠有光燁然始知其有隱德云

東坡識孫仲益

東坡元祐三年自翰苑出牧錢塘道毗陵之洛社時孫仲益之父教材童於野市茅屋之下仲益方七八歲立岸側東坡望見竒之呼來前與語果不凡詢其所學方爲七字對與之題云衡茅稚子璠璣器仲益應聲對曰翰苑仙人錦繡腸大加賞歎

集賢堂
卷之六
贈以縑帛囑其父善視之後果以文名

馬中玉

東坡知杭州日馬中玉成爲浙漕東坡被召赴闕
中玉席間作詞曰來時吳會猶殘暑去日武林春
已暮欲知遺愛感人深灑淚多於江上雨歡情未
舉眉先聚別酒多斟君莫訴從今寧忍看西湖擡
眼盡成腸斷處東坡和之所謂明朝歸路下塘西
不見鶯啼花落處是也中玉忠肅亮之子仲甫猶
子

嘉祐治平間中官杜浙好與舉子遊學文談不問
是非答親舊書如言此事甚大必曰茲務孔洪此
類甚多子瞻過維揚蘇子容爲守杜在坐子容少
怠杜遽曰相公何故溘然後子瞻再至問典客曰
今與會者誰對曰杜供奉子瞻曰今日不敢睡直
是怕也溘然

公移字

公移中字有日用而不知所自及因襲誤用而未
能正者姑舉一二如查字音義與槎同水中浮木

也今云查理查勘有稽考之義弔本傷也愍也今云弔卷弔冊有索取之義票與慄同本訓急疾今以爲票帖綽本訓寬緩今以爲巡綽盛本孟也今以爲鐵胄鐳本鉦也今以爲釧屬又如閘朝閘辦課程其義皆未可曉其亦起於方言也歟價直爲價值足穀爲足勾幹運爲空運此類尤多甚者施之章奏刻之榜文此則承譌踵謬而未能正者也

犬牙相制

國朝以潁州屬鳳陽潁州衛屬河南以漢中府隸陝西瞿塘等衛隸湖廣山西磁州千戶所在河南界中直隸寧山衛蒲州守禦所在山西境內湖廣五開衛貴州黎平府同治一城湖廣鎮遠衛貴州鎮遠府同治一城似此者不可勝舉亦犬牙相制之意

古今都會

歷代建都之處伏羲都于陳今河南開封府陳州有陵存焉神農亦都于陳或曰曲阜晉志曰都陳而別營於曲阜今山東兗州府曲阜縣黃帝都涿

鹿今順天府涿州括地志又曰涿鹿故城在媯州
今朶顏之地少昊都曲阜顓帝都帝丘今山東濮
州舊有陵碑尚存帝嚳都亳今河南偃師縣唐堯
都平陽今山西平陽府有唐城虞舜都蒲坂今山
西平陽府蒲州有廟夏都安邑今山西平陽府夏
縣春秋疏曰堯治平陽舜治蒲坂禹治安邑三都
相去各二百里俱在冀州蓋九州之冀也括地志
又曰自禹至太康與唐虞皆不易都汲冢書曰禹
都陽城漢志曰陽翟避舜子之所商都亳後盤庚

遷都亦曰亳書曰不常厥邑于今五邦蓋自湯至
盤庚五遷也祖乙遷景盤庚復遷于亳周都豐鎬
今陝西西安府長安縣關中也徐廣曰豐鎬相去
二十五里皆在長安南詩曰文王有聲作邑於豐
宅是鎬京維龜正之武王成之蓋都豐而遷鎬也
又曰都洛陽者洛陽今河南府洛陽縣也太史公
曰學者多稱周伐紂居洛邑其實不然武王營之
成王使召公卜之居九鼎焉而復遷豐鎬至平王
乃遷洛公羊傳又曰王城者何東周也成王既卜

營洛邑建明堂朝諸侯復遷豐鎬蓋以洛居中土故曰京師秦都咸陽今陝西西安府咸陽縣故古蹟阿房宮長信宮俱在此西漢始都洛陽五年因婁敬說而復遷長安東漢都洛陽魏都洛陽然諸書或曰長安曰譙曰許昌曰鄴者水經註曰魏因漢祚都洛陽以譙為先人本國許昌為漢之封居長安為西京遺迹鄴為王業本基故號五都時一幸焉耳蜀都成都今四川成都府吳初居鎮江都昌今湖廣武昌府後遷建業今南京應天府也

西晉都洛陽東晉都建康建康即建業元帝東渡避愍帝諱改焉宋齊梁陳俱都建康元魏初居雲中今山西大同府懷仁縣後遷洛陽北齊都鄴今河南彰德府西魏都長安關中後周都長安隋始都長安以城狹水鹹與蘇威高頴共議移去城北三十里龍首山都焉煬帝嘗徙都洛陽為巡幸故也唐都長安梁都汴今河南開封府後唐石晉漢劉知遠周郭威俱都汴宋亦都汴南宋都臨安今浙江杭州府元都大都今順天府時至上都今宣

府之外之地我大明都建康永樂間遷都于燕
爲京師今順天府也

鐵券

高皇卽位二年八月大將軍取燕都諸郡畢明年
冬念功臣勞烈之多欲申山河帶礪之誓賜以鐵
券下禮官議其制有奏唐和陵時賜錢鏐者其孫
尚藏因取爲式其質鐵其形如瓦高一尺濶二尺
左右二塊面鐫券文背刻免罪俸祿之數券文嵌
金故曰金書宋制高濶之制以公侯伯職之不同

漸亦短狹緣其所始乃漢丹書鐵契之意今錄魏
國一篇餘可知也朕聞自昔帝王創業垂統皆賴
英傑之臣削羣雄平暴亂然非首將智勇何能統
率而成大功唐漢初興諸大名將是也當時雖得
中原四夷未盡賓服以其宣謀效力之將比之豈
有過我朝大將軍之功者乎爾達自起兵以來爲
朕首將十有六年廓江漢清淮楚電掃兩浙席卷
中原威聲所振直抵塞外其間降王縛將不可勝
數頃者詔令班師星馳來赴朕念爾勤勞旣久立

功最多今天下已定論功行賞宜加爵祿是授爾
開國輔運推誠宣力武臣特進光祿大夫左柱國
太傅中書右丞相魏國公參軍國事食祿五千石
使爾子孫世世承襲朕本疎愚皆遵先代哲王之
禮典茲與爾誓除謀逆不宥其餘若犯死爾免三
死子免二死於戲高而不危所以長守貴也滿而
不溢所以長守富也爾當慎守斯言論及子孫世
世為國良臣豈不偉歟

宰相

歷代宰相之稱不一擇出書之以見美刺袁盎曰
申屠嘉為愚相公孫弘贊曰儒相田千秋乘車入
朝曰車丞相張蒼重計籍曰計相又贊曰名相王
商以貌稱真漢相翟方進曰通明相後漢杜林曰
任職相謝安曰風流宰相武后呼杜景佺憲宗稱
李絳皆曰真宰相令狐綯為相其子怙勢人稱為
白衣宰相盧懷慎曰伴食宰相陸贄號內相閻立
本為丹青宰相姚崇為救時宰相蘇味道為模稜
宰相李邦彥為浪子宰相梁陶弘景山中宰相蘇

環蘇頲贊曰再世賢相關播盲宰相楊再思癡宰相宋李沆曰聖相丁謂曰鶴相杜衍曰清白宰相陳升之曰荃相蔡確曰三旨宰相寇準為真相李綱為中興首相王欽若項有疣曰癭相蔡京童貫附之時人目京曰公相貫曰媪相梁師成擅寵為太尉人目之曰隱相宋慧琳道人權寵侔宰相孔顛嘆為黑衣宰相魏野亦稱白衣宰相

錢王券文

唐昭宗乾寧二年越州觀察使董昌僭號詔鎮海

節度使錢鏐討誅之賜鐵券形如瓦高尺餘濶二尺許券詞黃金商鞅其詞云維乾寧四年歲次丁巳八月甲辰朔四日丁未皇帝若曰咨爾鎮海鎮東等軍節度浙江東西等道觀察處置營田招討等使兼兩浙鹽鐵制置發運等使開府儀同三司檢校太尉兼中書令使持節閩越等州諸軍事兼閩越等州刺史上柱國彭城郡王食邑五千戶食實封一百戶錢鏐朕聞銘鄧騭之勳言垂漢典載孔惺之德事美魯經則知褒德策勳古今一致頃

者董昌僭偽東昏鏡水狂謀惡貫溷染齊人而爾
披攘兇渠盪定江表忠以衛社稷惠以福生靈其
機也氛祲清其化也疲羸泰拯甌越於塗炭之上
師無私焉保餘杭於金湯之間政有經矣志獎王
室績冠侯藩溢於旂常流在丹素雖鐘繇刻五熟
之金寶憲勒燕然之山未足顯功抑有異數是用
錫其金版申以誓詞長河有似帶之期泰山有如
拳之日唯我念功之旨永將延祚子孫使卿長襲
寵榮始終克保富貴卿恕九死子孫三死或犯常

刑有司不得加責承我信誓往惟欽哉宜付史館
須示天下鏐謝表云恩主賜臣金書鐵券一道臣
恕九死子孫三死者出於睿眷形此綸言錄臣以
絲髮之勞賜臣以山河之誓鑄金作字指日成文
震動神祇飛揚肝膽伏念臣爰從筮仕迨及乘麾
每自揣量是何叨忝所以行如履薄動若持盈惟
憂福過禍生敢忘慎初護末豈期此志上感宸聰
憂臣以處極多危慮臣以防微不至遂開聖澤永
保私門屈以常刑宥其必死雖君親屬念皆云必

恕必容而臣子爲心豈敢傷慈傷愛謹當日慎一日戒子戒孫不敢因此而累恩不敢乘此而賈禍聖主萬歲愚臣一心

紀年

紀年之號必擇前代所未有及正大光明之字少
有疑似卽不用矣如淳熙之淳先爲純字人言純
字有屯乃易爲淳有因時事而用好字者如國
朝天順之類是也有用先朝字者如唐德宗以建
中興元之亂追思太宗貞觀明皇開元爲不可及

也各取二字合爲貞元以法象之至宋孝宗遂爲
故事如隆興則取建隆紹興乾道則取乾德至道
若永樂乃宋時方臘及南唐賊張遇賢所僭年號
而正德亦西夏僭國年號當時廷臣更無一人記
憶何也此卽劉豫之母謚慈憲宋理宗生母亦謚
慈憲之類歟

募疏

豐城吳天祐者寄食於杭之陳氏冬無衣絮主人
戲之曰能作疏文當爲化主乃作疏曰伏以捉衿

露肘誰憐子夏之貧冬暖號寒不免昌黎之嘆含
羞在已貽笑於人切念天祐半生若蟻一拙如鳩
身常苦饑寒頗類吟詩之賈島志不在溫飽媿非
及第之王曾雖字頗能識而書頗能讀然饑無所
食而寒無所衣灞橋踏雪難堪手足之凌兢剡水
乘舟無奈身心之顫掉鄴侯萬卷亦徒耳范叔一
寒如此哉幸托身依桑柘之鄉而長者擅絲綿之
利深筐大簿價輕千鎰之黃金溫繭柔綿色瑩三
冬之白雪眼見之而忽熱心欲之而難言旣民胞
物與之同然豈推食解衣而不可惠而好我實爲
道誼之交勉爾求人不知言辭之拙分我一團和
氣耐他千載歲寒高誼難忘服之於膺而佩之於
背衆輕易舉與不傷惠而取不傷廉袁安免僵臥
於洛陽師道不忍寒於郊祀若肯結緣秀士也勝
布施山僧十謁朱門何畏滿頭之風雪一吹鄒律
頓回幽谷之陽春徧告斯文圖成善事謹疏陳氏
遂爲之占籍仁和膺甲子鄉薦

老泉

世傳老蘇號老泉長公號東坡而葉少蘊燕語云
子瞻謫黃州因其所居之地號東坡居士晚又號
老泉山人以眉山先塋有老人泉故云又梅聖俞
有老人泉詩東坡自註家有老人泉公作此詩坡
嘗有東坡居士老泉山人八字共一印見於卷冊
間其所畫竹或用老泉居士朱文印章則老泉又
是子瞻號矣歐陽公作老蘇墓志但言人號老蘇
而不言其所自號亦可疑者豈此號涉一老字而
後人遂加其父邪葉蘇同時當不謬也

衍聖母上表

孔子五十二代孫衍聖公孔之固早卒妾任氏生
子湏襲爵族人以不事儒雅攻之禡其爵任氏上
表曰竊聞菽自菽麥自麥雖后稷之聖不能化穗
以成芒渭自渭涇自涇雖大禹之神不能變清而
爲濁蓋天理有不移之義豈聖門容異姓之人伏
念臣妾之子孔湏乃五十一代襲封衍聖公孔元
措之嫡孫五十二代襲封衍聖公孔之固之家嗣
生長從於穉齒提挈至於成人有美維髯遺印在

耳雖云庶出實係長房爲經板蕩以來遂失過庭之訓以致宗族鬩議詞訟無休吾道于是乎不光祀事以之而大缺肝心殞裂泣涕無從但以名隸寡妻身當圯族抱閨門之戚戚望天闕之悠悠所積瀰漫何由控愬必遇清明之世能平精衛之冤茲者伏遇上天眷命皇帝陛下龍飛九五運應一千始爲儒教大宗師今作中原聖天子乾坤浩浩一新汙俗之餘日月煌煌照彼覆盆之下無淹不振有廢皆興顧惟孔氏之家實係生民之望千七

百載厥聞愈彰五十三傳其直如矢自相沿於百代曾莫紊於一朝至於賢與不肖在人品高低之不一嫡仍復嫡見天心付與之分明方當朝廷甫定之秋適屬士論向公之日伏望陛下俯垂昭鑒大廓聖源因之以禮義之方加之以師傅之職有教固無類也見賢然後用之上可以立皇朝繼絕之良規下可以導聖祀無窮之正派雖文昭武穆不幸有幽厲之衰柰丹朱商均未害爲堯舜之後自惟蟻螳輒犯雷霆臣妾不勝惶懼戰栗之極匍

匍待死闕下泣血奉表以聞元憲宗八年也詔憫之遷瀆爲維州尹

史法之異

史筆紀載不同如南朝北朝之史皆李燾所作也南史先傳循吏北史先傳儒林南史兼傳文學北史則傳文苑南史傳孝義北史則改爲孝子南史傳夷貊北史則改爲四夷與夫酷吏藝術列女南史所無而北史皆傳之曷嘗比而同乎李唐五代史皆歐陽所作也唐史志天文而五代則爲司天

唐史志地理而五代則爲職方唐史傳后妃而五代則爲家人唐史表世家而五代則述世家與夫循吏酷吏儒學文藝唐史所有而五代皆無之

張曲江世系

劉夢得言曲江爲相建言放臣不宜與善地因致燕翼無似終爲餒魂近世筆疇諸小說皆因之不考之過也當時徐浩作公碑銘明言嗣子拯居喪以孝聞立身以行著陷在寇逆不受僞官及收復兩京特制拜朝散大夫右贊善孫藏器河南府壽

焦氏筆身 卷之六
十一
安尉永保先業克稟義方是公且有賢子孫矣又
唐書宰相世系表九齡子拯右贊善大夫拯子藏
器長水丞藏器子敦慶袁州司倉參軍敦慶子
景新景新子涓嶺南觀察衙推弟郎湖南鹽鐵判
官涓子浩仁化令浩孫文嵩監東太倉自九齡至
文嵩八葉之中仕宦不絕而夢得云云得非竊語
耶一時不根之言未加審諦輒形紙墨世之類此
者當不爲少

唐羌上書

嶺南舊獻生龍眼荔枝十里一置五里一候
簿送漢和帝永元中臨武長唐羌上書曰臣聞上
不以滋味爲德下不以貢膳爲功南州炎熱惡蟲
猛獸不絕於路獻生龍眼荔枝者觸犯死亡不可
勝數死者不可復生來者猶可救也詔曰遠國珍
羞本以薦奉宗廟苟有傷害豈愛民之本其敕太
官勿復受獻觀此則進荔枝不獨非開元時也永
元一詔語簡而意盡得王言之體

劉弘

晉惠帝太安二年義陽蠻張昌反都督荊州軍事
劉弘以南蠻長史陶侃爲大都護衙門將皮初爲
都戰帥攻昌於竟陵大破走之降其衆弘謂侃曰
吾昔爲羊公參軍謂吾後當居其處今觀卿必繼
老夫矣時荆部守宰多闕弘表皮初爲襄陽太守
朝廷以初望淺更用弘壻夏侯陟弘曰夫治一國
者宜以一國爲心必若姻親然後可用則荊州十
郡安得十女壻然後爲政哉乃表陟姻親舊制不
得相監皮初之勳宜見酬報詔聽之弘能識侃與
初於稠人之中又不以掩於親愛史稱其公當是
矣今之用人者非瑣瑣姻婭必其門生故吏耳惡
能辨別賢不肖爲國家計哉善乎弘之言治一國
宜以一國爲心然則治天下不以天下爲心者皆
弘之罪人也

舊曾集諸書藥方嗣得者更錄于此

曾公談錄云荆芥穗爲末以酒調下二三錢中風
者服之立愈前後甚驗是日順兒疾已革以酒滴
水中調服之立定真再生也

蓼花洲閒錄云治走馬疔方用瓦壘子此罇子差小未經醬

淹者連肉火煨存性置冷地用蓋子蓋之候冷取出

碾為末瓦滲患處

瘡疹黑陷者用沉香乳香檀香不拘多少於火盆

內焚之抱兒於煙上熏即起

馬蹄燒灰入鹽少許滲走馬疔患處

治惡瘡取冬瓜一枚中截先以一頭合瘡上候瓜

熱削去再合熱減乃已

治破傷風用黃連五錢酒一盞煎至七分入黃蠟

二錢同煎和滓服

治惡瘡用蒜泥作餅瘡上灸不痛者灸痛即止痛

者灸不痛止

小兒耳後瘡腎疔也地骨皮一味為末粗者熟湯

洗細者香油調搽良已上神秘方

宋趙潛養疔湯筆云凡人溺死者及服金屑未死

者以鴨血灌之可活

耳暴聾者用全蝎去毒為末酒調滴耳中聞水聲

即聾愈

枸杞子搾油點燈觀書能益目力

金瘡刀斧傷用獨殼大栗研為乾末傅之立止或

倉卒用生嚼傅亦驗

喉痺并乳鴛蝦蟆衣鳳毛草搗細入鹽霜梅肉煮

酒各少許和再研細布絞汁鴛毛刷患處隨手吐

痰即消

癰疽惡瘡初腫起當歸黃蘗皮羌活為細末生鷺

鷯膝搗汁調傅瘡之四圍自然收毒聚作小頭即

切破不可併瘡頭傅之恐毒氣四攻不可收也

新昌徐氏婦病產名醫陸在二百里外輿致之及

門婦已死但胸膈間微温耳陸診之良久曰此血

悶也得紅花數十斤則可活主人亟購如數陸乃

以大鍋煮之候湯沸遂以三木桶盛湯於中取窓

格藉婦人寢其上湯氣微復進之有頃婦人指動

半日遂蘇

骨鯁用大涎穀芒用鷺涎無弗愈者皆以意推也

孝宗嘗患痢眾醫不效德壽憂之過宮偶見小藥

肆遣中使詢之曰汝能治痢否對曰專科遂宣之

至問得病之由語以食湖蟹多故致此因診脉曰此冷痢也用新采藕節細研以熱酒調服如其法杵細酒調數服卽愈德壽大悅就以金杵白賜之至今呼金杵白嚴防禦家

病眼生赤瘴者取田螺一枚去掩以黃連末摻之置于露中曉取則肉化爲水以之滴目赤瘴自消治嗽方甚多余得一方但用香櫟去核薄切作細片以時酒同入砂瓶內煮令熟爛自昏至五更爲度用蜜拌勻當睡中喚起用匙挑服甚效又越州

一學錄云少苦嗽百藥不瘳或教用向南采桑條一束每條寸折入鍋中大約用水五碗煎至一碗於盛暑中遇渴飲之服一月愈

象山縣村民患水腫一人授之方用田螺大蒜車前草和研爲膏作大餅覆臍上水從便出數日愈吹劍續錄云松陽縣民有被毆經縣驗傷翼日引驗了無癰痕宰恠而詰之乃仇家使人要歸飲以熟麻油酒臥之火燒地上覺而疼痛盡消又有肩髀中創血如箭出醫者以炒原蠶蛾末傳之立止

故前方大治癩撲後方能已金瘡

文昌雜錄云禮部王員外言昔在金陵一士子爲魚鯁所苦累日不能飲食忽見賣白餠者因買食之頓覺無恙然後知餠能治鯁也後見孫真人書已有此方矣余知安州有鼎州通判柳應辰爲余傳治魚鯁法以倒流水半盞先問其人使之應吸其氣入水中面東誦元亨利貞七遍吸氣入水飲少許卽差

宋龐元英談藪云徑山寺僧行菜畦間爲蛇傷足久之一脚皆爛常住召醫積費數百千不能愈一游僧見之曰吾能治此汲淨水洗病脚腐膿病肉悉去之易水數器瘡上白筋數見挹以軟帛解包取藥末勻糝瘡中惡水泉涌良久乃止明日淨洗如初日日皆然水漸少肉漸生一月平復合寺僧酬以錢物云吾與山門結緣豈爲利也却不受主僧曰山中多蛇虺願得奇方備急僧云和尚有命敢不從但不必廣傳香白芷爲末入鴨嘴磨麝香各少許臨期以意斟酌之未幾僧去長老升座

以此方徧告諸人

孫琳路鈴本殿前司徒兒寧宗爲郡王病淋日夜
三百起國醫罔措有薦孫者光宗時在東宮亟召
之至孫求二十錢買大蒜淡豉蒸餅三物爛研爲
丸令以溫水下三十丸且曰今日進三服病當減
三之一明日再進如之三日則病除已而果然賞
以千緡奏官右列或問之曰小兒安有淋只是水
道不通利蒜豉皆通利無他巧也

張知閣久病瘧遇熱作如火年餘骨立醫以爲虛
餌之茸附熱益甚召孫診視許謝五十萬孫笑曰
但安樂時湖上作一會足矣命官局贖小柴胡湯
三貼服之熱減十九又一服病脫然孫曰是名勞
瘧熱從髓出又加剛劑剝損氣血安能不瘦蓋熱
藥不一有去皮膚中熱者有去臟腑中熱者若髓
熱非柴胡不可北方銀州柴胡只須一服南方力
減須三服乃效今却可進滋補藥矣
一少年子娶妻後得軟脚病痛特甚醫以爲脚氣
孫聞之曰此不必診視但買杜仲一味寸斷片析

每兩用半酒半水合一大盞煮六分頻服之三日能行又三日如未嘗病者孫曰府第寢處高明衣履燥潔無受濕之理但新娶色欲過度致然杜仲專治腰膝以酒行之爲效易矣其奇驗多此類溧水溧陽舊多蠱毒丞相韓滉爲浙西觀察欲絕其源不可得時有僧住竹林寺每絹一疋易藥一丸遠近中蠱者多獲濟值滉小女有惡疾浴於鎮之溫湯卽愈乃盡捨女之粧奩造浮圖廟於湯之右巽得名僧以守有以竹林市藥僧應者滉欣然迎置且求其藥方久之僧始獻乃刊石於二縣之市唐末石不復存鎮之夏氏世傳其法藥名溫湯丸志所自也用五月初生桃皮末二錢蟹螯末一錢先以麥麩炒去翅足生大戟末二錢共三味以米泔淀爲丸如棗核形如中一切蠱毒食前用米泔下一丸脩合時於淨室中忌婦人孝子猫犬見吳興莫君陳著書名月河所聞載王駙馬師約年四十九髭髮白醫教之服茯苓每日秤二兩以代晚食其法咬咀之蜜水洒過小甌微炆令潤匙抄

時以少湯嚥之每次不過半酸服已二年極康強
善飲酒楊次公服二十年每日服一彈丸茯苓華
山爲上其次東山謂京東諸山

獨異志云貞觀中張寶藏爲金吾吏時太宗苦氣
痢醫療不效寶藏曾困其疾卽具疏以乳煎草撥
進上服立差宣宰臣與五品官魏徵難之逾月上
疾復發復命寶藏進前藥又平因曰與進方人五
品官不見除授何也徵云未知文武二吏上曰治
得宰相不妨已授三品矣乃厲聲曰與三品文官

卽授鴻臚卿

隋書志云江南之地多蠱以五月五日聚百種蟲
大者至蛇小者至虱合置器中令自相啖因食入
人腹內食其五臟死則其產移蠱主之家若盈月
不殺人則蠱者自踵其害累世相傳不絕自侯景
之亂殺僂殆盡蠱家多絕飛遊道路之中則殞焉
每亥夜飛出飲水其光如星鮑照詩吹蠱痛行暉
是也范石湖集云蠱毒在上則服升麻吐之在腹
則服鬱金下之或合升麻鬱金服之不吐則下宋

李巽巖侍郎燾爲雷州推官鞠獄得此方活人甚多

近峰聞略云予在呂梁時生汗癩百藥不能愈及在禮部太醫院爭進方藥癩愈甚及艱歸崑山周春谷訪予以癩示之春谷曰此甚易可坐而掇也爲灸天突左右各三壯卽脫然愈至今不發皮硝入雞腹中同煮食之可消痞疾

一稚子戲以線錘置口中誤吞之有胡僧啖以餲糖半斤卽於谷道中出僧云凡誤吞五金皆可啖也

山東一家五百口共爨二百餘年不染疫癘其家每年以三伏日收苦草日一束陰乾至冬至日爲末正旦五更蜜調之每人服一匕卽古屠蘇之義北夢瑣言云醫者意也古人不因切脉隨知病源者必愈唐崔魏公鉉鎮渚宮有富商中夜暴亡迨曉氣猶未絕有武陵醫士梁新聞之乃與診視曰此食毒也三兩日得無外食邪僕曰主公少出船亦不食於他人梁新曰尋常嗜食何物僕口好

食竹雞每年不下數百隻新曰竹雞喫半夏必是
半夏毒也命搗薑捩汁折齒而灌之方蘇崔魏公
聞而異之召到衙慰獎資以僕馬錢帛令入京致
書朝士名大振仕至尚醫奉御一朝士詣之新曰
何不早見示風疾深矣請速歸處置家事朝士皇
遽策馬而歸時鄜州馬醫趙鄂新到京都自勝姓
名云攻醫術朝士下馬告之鄂亦言疾已危與梁
生所說同謂曰只有一法請官人剽喫消梨不限
多少時咀齧不及捩汁而飲或希萬一此朝士亟

策馬歸以書筒質消梨馬上旋齧到家旬日唯喫
消梨頓覺爽朗疾遂已却往謝趙生又訪梁奉御
具言得趙生教也梁驚異且曰大國必有一人相
繼者遂召趙生資以僕馬錢帛廣爲延譽官至太
僕卿

唐時一婦人從夫宦南中誤食一蟲常疑之由是
成疾頻療不愈京城一醫忘其名知所患乃請王
姨姪中謹密者一預誠之今以藥吐但以盤盂盛
之當吐之時只言有一蝦蟆走去勿令娘子知是

誑語也其奴僕遵之此疾永除

曲洧舊聞云東坡至儋耳見野花夾道如芍藥而小紅鮮可愛樸楸叢生土人云倒黏子花也結子如馬乳爛紫可食殊甘美中有細核并嚼之瑟瑟有聲亦頗澁童兒食之或大便難葉背白如石韋狀野人夏秋病痢食其葉輒已海南無柿人取其皮剝浸爛杵之得膠以代柿漆蓋愈於柿也吾久苦小便白濁近又大腑滑百藥不瘥取倒黏子嫩葉蒸之焙乾爲末以酒糊丸日吞百餘二腑皆平

復然後知其竒藥也因名海漆而私記之始好事君子明年子熟當取子研濾酒爲膏以劑不復用糊矣

凡爲風狗毒蛇齧者只以人糞塗傷處極妙新糞尤佳諸藥不及

凡禽鳥翅足折者餒之芝麻仍嚼爛敷患處卽愈有愛物之心者宜識之

造海石法用苦瓜萇擣碎同煨過蛤殼粉拌勻作餅曬乾入藥用此物最去痰蓋鹹能軟堅蛤生海

中凝結成殼得鹹性多故能破痰之牆壁而瓜蔓
又去痰之藥故用之相和則攻去凝結之老痰極
有效或以海浮石爲海石者非是

周學士維亨知醫一同官得疾徧體癱不可忍諸
醫云中風云中濕云脚氣悉不效周疑氣血凝滯
所致爲製一散飲之愈用延胡索桂當歸等分依
常法治之爲末温酒調三四錢隨酒量頻進之以
止爲度蓋延胡索活血化氣第一品也其後趙待
制道引失節支體拘攣亦數服愈

凡食河豚者一日內不可服湯藥恐內有荊芥蓋
與此物大相反亦惡烏頭附子之屬其子尤不可
食能使人脹死試以水浸之經宿顆大如芡實世
傳中其毒者亟飲穢物乃解否則必亡又聞不必
用此以龍腦浸水或至寶丹或橄欖皆可解後得
一方用槐花微炒過與乾燕支各等分同搗粉水
調灌大妙

焦氏筆乘續集卷七
一六用賦芬姤妙戲與薄
用此以韻韻水如
專中其毒皆如
食掠野人
與此大味又亦惡魚煎削于之區且于次下
凡食所相昔一日內不可相與藥恐內有佛茶蓋

焦氏筆乘續集卷七

秣陵焦竑弱侯輯

門人謝與棟吉甫

男焦尊生茂直

校

金陵舊事上

金陵爲斗分晉永嘉中歲星熒惑太白聚牛女之間識者以爲吳越之間當興王者是歲元帝登寶位故史臣曰星斗呈祥金陵表慶

長短句中六州歌頭音節最爲悲壯昨見王潛齋
楚詠金陵二闋讀之亦自爽然龍蟠虎踞今古帝

王州水如淮山似洛鳳來遊五雲浮宇宙無終極
千載恨六朝事同一夢休更問莫閒愁風景悠悠
得似青溪曲着我扁舟對殘烟衰草滿日是清秋
白鷺汀洲夕陽收黃旗紫蓋中興運鐘王氣護金
甌駐遊蹕開行殿夾朱樓送華輶萬里長江險集
鴻鴈列貔貅埽關河清海岱志應酬機會何常鶴唳
風聲處天意人謀臣今雖老未遣壯心休擊楫中
流

句容縣吳瀆塘有半湯湖湖水半冷半熱熱可以

淪雞皆有魚髮入輒死今湯山下有湯泉屬上元

齊永明九年秣陵安明寺有古樹伐以為薪木自
然有法大德三字

晉時有徐景於宣陽門外得一錦麝襪至家開眡
有蟲如蟬五色後兩足各綴一五銖錢

南朝有姥善作筆蕭子雲常書用筆心用胎髮開
元中筆匠名鐵頭能瑩管如玉莫傳其法

句曲山五芝求之者投金環二雙於石間勿顧念
必得矣第一芝名龍仙食之為太極仙第二芝名

參成食之為太極大夫第三芝名燕胎食之為正
一郎中第四芝名夜光洞鼻食之為太清左御史
第五芝名料玉食之為三官真御史

魏李騫崔劼至梁同泰寺主客王克舍人賀季友
及三僧迎門引接至浮圖中佛傍有執板筆者僧
謂騫曰此是尸頭專記人罪騫曰便是僧之董狐
復入二堂佛前有銅鉢中然燈劼曰可謂日月出
矣燭火不息

夜光芝一株九實實墜地如七寸鏡夜視如牛目

茅君種於句曲山

胡綜博物孫權時掘得銅匣長二尺七寸以琉璃
為蓋又一白玉如意所執處皆刻龍虎吸蟬形莫
能識其由使人問綜綜曰昔秦皇以金陵有天子
氣平諸山阜處處輒埋寶物以當王氣此蓋是乎
以上八則出西陽雜俎

幸思順金陵老儒也皇祐中沽酒江州人無賢愚
皆喜之時劫江賊方熾有一宮人艤舟壚下偶與
思順往來相善思順以酒十壺餉之已而被劫掠

於蘄黃間羣盜飲此酒驚曰此幸秀才酒耶官人
識其意即給曰僕與幸秀才親舊賊相顧嘆曰吾
儕何為劫幸老所親哉歛所劫還之且戒曰見幸
慎勿言思順年七十二日行二百里盛夏暴日中
不渴蓋嘗啖物而不飲水云 東坡外集

皇象書人間殊少惟建業有吳時天發神識碑若
篆若隸字勢雄偉相傳乃象書也張懷瓘日以沈
着痛快真得其筆勢云 東觀餘論今在應天府學

御史劉燾字無言嘗言金陵有唐高正臣書本埋
沒圃中其父宜翁令人發出立之今易致其字畫
殊有虞褚法也 今在栖霞寺

頃見江南後主錯金書題藏真書千字曰戴叔倫
詩云詭形恠狀翻合宜誠哉是言今見藏真自叙
乃有叔倫全章此卷真蹟豈亦江南集賢所畜書
乎

東晉興寧二年太歲甲子土真司命紫虛元君南
嶽魏夫人降丹陽之句曲山以上清諸真經授弟
子瑯琊王公府舍人楊君使作隸字書出以傳護

軍長史父子魏傳青錄文所謂起安啟年經乃始
傳得道之子當修玉文黃庭內景乃其一也亦名
琴川文又名太帝金書又名東華玉篇自楊許仙
去大傳於世而積載既久轉寫多誤如以尊為前
以通為遍以胥為骨以飛為緋此例甚眾唯華陽
登真隱訣所載乃楊許舊本可以據依今參讎眾
本而以隱訣是正庶幾不失真語云政和七年丁
酉正月丙辰雲林子黃伯思於丹陽東竺書

圖經云金陵者洞墟之膏腴句曲之地肺其土肥

良故曰膏腴水至則浮故曰地肺

崔造韓會盧東美張正則為友皆僑居上元好談
經濟之略以王佐自許時人號為四夔

南部新書

永貞二年三月彩虹入潤州大將張子良宅初入
漿甕水盡入井飲之後子良擒李錡拜金吾尋歷
方鎮

徐鍇久次當遷中書舍人游簡言當國每抑之曰
以君才地何止一中書舍人然伯仲並居清要恐
物忌太盛不如少遲之鍇頗快快簡言徐出伎佐

魚氏筆乘 卷之十 五
酒所歌皆錯詞錯大喜乃起謝曰丞相所言乃錯
意也鉉聞之嘆曰弟癡絕乃爲數闋詞換却鳳皇
池乎 陸務觀南唐書

徐錯處集賢朱黃不去手非暮不出嘗指其家曰
吾直寄此耳少精小學故所讐書尤審諦江南藏
書之盛爲天下冠錯力居多

柴克宏未遇時其母自表子可將又言克宏有父
風苟不能任孥戮無悔元宗始用之所向有功官
至奉化軍節度使

刁衍事後主爲集賢校理以文翰見知淳淡夷粹
恬於仕進暇日鼓琴圍碁不交人事孫約亦名士
久在三館晚築室潤州號藏春鳴王安石蘇軾皆
尊愛之

史虛白與韓熙載歸江南宋齊丘方柄用虛白曰
彼可取而代也齊丘不平欲窮其技能召與宴飲
設倡樂奕棋博戲酒數行雜出書檄詩賦碑頌使
製之虛白方半醉命數人執紙口占筆不停綴俄
而衆篇悉就詞采磊落坐客驚服

金陵睦昭符刺史常州爲政寬簡甚得民心一日
坐聽事雷雨猝至電光如金蛇而案吏卒震仆昭
符撫案叱之雷電遽散舉案得鐵索重百斤昭符
神色自若徐命舉索納庫中

李建勳以司空致仕賜號鐘山公營別墅山中放
意水石或謂之曰公未老也而遽爲此豈欲復爲
九華先生邪建勳曰吾平生笑宋公輕出處何至
效之自知來日無多欲求數年間適爾

宋齊丘當國深忌同列少所推遜然獨稱建勳曰

李相清談不待潤色自成文章

馮延魯銳進而喜言高退嘗早朝集漏舍嘆曰玄
宗賜賀監鏡湖三百里非所敢望得玄武湖足暢
平生矣徐鉉笑曰上禮賢如不及詎惜一湖恨時
無知章耳延魯慙不能對

江南後主造澄心堂紙甚爲貴重宋初紙猶有存
者歐公曾以二軸贈梅聖俞梅以詩謝曰江南李
氏有國日百金不許市一枚當時國破何所有帑
藏空竭生莓苔但存圖書及此紙棄置大屋墻角

堆幅狹不堪作詔命聊備粗使供鸞臺相傳淳化閣帖皆此紙所榻歐公五代史亦用此屬草

江令宅在秦淮上今尚書顧華玉所居云是其處劉禹錫有詩南朝詞臣北朝客歸來惟見秦淮碧池臺竹樹三畝餘至今人道江淹宅

金陵詞是臺城妓作宮中細草香紅濕宮內纖腰碧窓泣唯有虹梁春燕雛猶傍珠簾玉鈎立

丹陽記云江寧縣南二十里有慈母山積石臨江生蕭管竹自伶倫采竹嶰谷其後唯此籥見珍故

歷代常給樂府俗呼鼓吹山今慈湖戍常禁采之王褒洞簫賦即稱此也其竹圓緻異於衆處

朱遵度本青州書生好藏書隱居不仕保大中卜築金陵著鴻漸學記一千卷羣書麗藻一千卷漆經數卷皆行於世

韓熙載墓在今聚寶門外雨花臺年久不知其處初熙載得罪南遷上表云無橫草之功可禪於國有滔天之過自累其身老妻伏枕以呻吟稚子環牀而坐泣三千里外送孤客以何之一葉舟中汎

病身而前去後主覽而悲之遂免南行尋卧疾終於城南戚家山賜衾襦以殮贈平章事所司謂無贈宰相例後主曰當自我始徐鉉祭文有云黔婁之衾賜從御府季子之印佩入泉扃指此紀瞻字思遠丹陽秣陵人才兼文武朝廷稱其忠亮雅正明帝一日引於廣室慨然言社稷之臣欲無復十人如何因屈指曰君使其一瞻擬議辭避帝曰方與君善語復何事謙挹

江寧縣寺有晉長明燈歲久火色變青而不熱隋

文帝平陳已訝其古至今猶存

隋唐嘉話

王右軍告誓文今之所傳即其藁草不具年月日朔其真本云維永和十年三月癸卯朔九日辛亥而書亦真小開元初年潤州江寧縣瓦官寺脩講堂匠人於鴟吻內竹筒中得之與一沙門至八年縣丞李延業求得以獻岐王便留不出十二年王家火圖書悉為煨燼此書亦見焚云

沈瑀武康人善吏事嘗役民速而無怨開湖熟縣方山埭築赤山塘所費減材官所量數十萬

瑀永

秦爲建德令

思陵車駕巡師建康詔以防秋在近令侍從職事官各條其利害實可施行者聞奏郎官張虞卿所陳最善其略曰臣嘗歷考前世戰爭之際魏軍嘗至瓜步矣石季龍掠騎嘗至歷陽矣石勒寇豫州至江而還此皆限於江而不得騁者也然江出岷山跨郡十數備之不至一處得渡皆爲我憂使吾斥堠旣明屯戍唯謹士氣振而人心固矣恃長江爲阻可也雖無長江亦可也苻堅百萬之衆馬未

及一飲江水謝玄以八千銳卒破之於淝水豈非其效也歟不然王巢以竒兵八百泛舟渡吳人有北來諸軍乃飛過江諸語韓擒虎以五百人宵濟采石守者皆醉遂襲取之由是觀之徒恃江而人不足與守難以濟矣曹操初得荊州議者謂東南大勢可以拒操者長江也操旣得荊州蒙衝戰艦浮江而下則長江之險已與我共之矣獨周瑜謂舍鞍馬仗舟楫非彼所長赤壁之役果有成功至羊祜則以南人所長惟在水戰一入其境長江非

復所用他日成功略如祜策故臣以謂無如瑜者
爲用則祜之言不可不察也說者謂虜以馬爲強
而江流迅急渡馬爲難虜便於作棧而江流迅急
非棧能濟是未知侯景以馬數百一夕而渡王濬
自上流來嘗用大棧也州縣有最爲要害者津渡
有最宜備豫者苻堅自項城來壽陽侯景自壽陽
移歷陽孫恩自廣陵趨石頭王敦渡河格蘇峻濟
橫江侯景渡采石考前世盜賊與南北鬪兵由壽
陽歷陽來者十之七由橫江采石渡者十之二至

於據上流之勢以窺江左者尚未論也文多不載
江南府庫中書畫至多其印記有建業文房之印
內合同印集賢殿書院印以墨印之謂之金圖書
言惟此印以黃金爲之諸書畫中時有李後主題
跋然未嘗題書畫人姓名唯鐘隱畫皆後主親筆
題鐘隱筆三字後主善畫尤工翎毛或言凡書鐘
隱筆者皆後主自畫後主嘗自號鐘山隱士故晦
其名謂之鐘隱非姓鐘人也今世傳鐘畫但無後
主親題者皆非也

沈存中筆談

山謙之南徐州記曰延陵縣南有茆山漢元帝時咸陽人茅盈及弟固得道之處

異苑曰丹陽湖側有梅姑廟生時有道術能着履行水上夫壻怒殺之投屍水中乃流至廟處卽時有方頭漆棺在祠下晦望之日時見水霧中有形廟左右不敢取魚射獵

劉虛白金陵人善三輔學堂只相兩府見曾子固曰乞兒也陳執中爲撫州通判使者將劾之虛白曰無患公當作宰相使者果被召半道而去王益

知韶州自期必至公輔韶有張九齡廟相傳兩府過雖赤日亦雨王過雨作尤自負還金陵盛服見虛白曰何時入兩府虛白笑曰只可作都官益大怒欲危以事時茶禁嚴聞虛白自南來令人伺察一郡將庇之獲免虛白竟以他事杖脊而益果終都官郎中

米芾有潔疾方擇壻聞建康段拂字去塵芾釋之曰旣拂矣又去塵真吾壻也以女妻之

謝安石墓在雨花臺畔梅子岡後遷葬長興九鷗

岡子孫因有居其地者謝以文學世其家有集安石而下歷宋齊梁陳凡十有六人詩三百四十餘篇為謝氏蘭玉集十卷吳興汪聞為序

東坡云金陵艾宣畫翎毛花竹為近歲之冠既老筆跡尤奇雖不復精勻而氣格不凡今尚在然眼昏不復能運筆矣嘗見此物各為賦一首云

葛洪結廬方山山有洗藥池洪有詩云洞陰泠泠風珮清清仙居永劫花木長榮 一云池在興國縣

王彪之與諸兄弟別於方山賦詩脂車總馳輪汎

舟理飛棹絲染墨悲歡路岐楊感悼

桃葉渡在秦淮王獻之有桃葉歌桃葉復桃葉渡江不用楫但渡無所苦我自迎接汝桃葉復桃葉桃樹連桃根相憐兩樂事獨使我殷勤桃葉亦有歌桃葉映紅花無風自婀娜春花映何限感郎獨采我桃葉復桃葉渡江不待櫓風波了無常沒命

江南渡

吳均續齊諧記桓玄篡位後朱雀門中忽見兩小兒通身如墨相和作籠歌云芒籠茵繩縛腹車無

軸倚孤木路邊小兒從而和之者數十人聲甚哀
楚日旣夕二小兒入建康縣至閣下遂成雙漆鼓
槌明年春而桓敗車無軸倚孤木桓字也荊州送
玄首用敗籠茵包之又芒繩縛其屍沈諸江中悉
如所歌

建康小吏曹著爲廬山君迎至廟廟門外置一大
甕可受數百斛嘗有風雲出其中廬山君夫人呼
其女婉出見著容色甚麗著大悅夫人命婢瓊林
取琴命婉鼓之婉撫琴而歌曰登廬山兮鬱嵒峩

晞陽風兮拂紫霞招若人兮濯靈波欣良運兮暢
雲柯彈鳴琴兮樂莫過雲龍會兮登太和歌畢卽
趨入廬山君因以婉妻著居頃之著求還婉泫然
賦詩爲別贈以織成衫袴

十八高賢傳曇叡晚居建康烏衣寺彭城王義康
遺之貂裘叡以爲褥義康陰使人以錢三十萬買
之不從謝靈運常就問叡經中竒字

廬山疏云僧智瑛上元縣人正統初住雲溪寺因
號雲溪初行頭陀行爲諸僧負薪米力作已而有

所悟生平不識文字晚乃能詩廬山自天眼後得
佛宗旨者唯瑛一人晚年忽語其徒曰某月日吾
當逝逝必有風雷之警既近期又預報廬山諸庵
主使來集及期諸庵主集天朗霽無纖雲咸疑其
言不售幾罷去既午有片雲起西北瑛乃沐浴具
威儀禮諸佛退與諸庵主別已而疾風震雷掣茅
墮瓦風疾旋自下上轉入空際東南逝視瑛已遷
化矣

宋孝武遊覆舟山詩束髮好怡衍弱冠頗流薄素

想終勿傾聿來果丘壑層峰亘天維曠緒緜地絡
逢臯列神苑遭壇樹仙閣松燈含青暉荷源煜彤
爍川界泳造鱗巖庭響鳴鶴

華林園卽吳宮苑地宋元嘉中更脩廣之鑿天泉
池造景陽樓大壯觀花光殿設射堋孝武率羣臣
燕集效柏梁體爲詩九宮盛事予旒纁帝三輔務

根誠難亮

揚州刺史江夏王義恭

策拙粉鄉慙恩望

南徐州刺史竟

陵王

折衝莫效興民謫

領軍將軍元景

侍禁衛儲恩踰量

太子右

率暢臣謬叨寵九流曠

吏部尚書

喉唇廢職方思

讓侍中明筆直繩天威諒御史中丞

顏師伯

方山在城東南三十里吳大帝為葛玄立觀於其上謝靈運有鄰里相送至方山詩

鮑明遠有侍宴覆舟山詩二首其一息雨清上郊

開雲照中縣遊軒越丹居暉燭集涼殿凌高躋飛

楹追焱起流宴松苑含靈羣崑庭藏物變明輝燦

神都麗氣冠華甸目遠幽情周體洽深恩遍其二

繁霜飛玉闕金景麗皇州清蹕戒馳路羽蓋佇宣

游神居既崇盛崑險信環周禮俗陶德聲昌會溢

民謳慚無勝化質謬從雲雨浮一作游

三山在城西南三十七里下臨大江明遠有還都

至三山望石頭城詩泉源安首流川末澄遠波晨

光被水族曉氣歇林阿兩江皎平迴三山鬱駢羅

南帆望越嶠北榜指齊河關扃繞天邑襟帶抱尊

華長城非壑嶮峻咀似荆芽攢樓貫白日擣堞隱

丹霞征夫喜觀國遊子遲見家流連入京引躑躅

望鄉歌彌前歎景促逾近倦路多偕萃猶如茲弘

易將謂何

明遠行京口至竹里詩高柯危且竦鋒石橫復仄
復澗隱松聲重岬伏雲色冰閉寒方壯風動鳥傾
翼斯志逢凋巖孤遊值曠逼兼塗無憩鞍半菽不
遑食君子樹名細人効命力不見長河水清濁
俱不息今上元東北六十里有竹里橋云宋武帝
討桓玄其路經此

王融侍遊方山應詔賦詩巡躅望登年悵飲臨秋
縣日羽鏡霜溽雲旗落風甸四瀛良在目八寓宛
如見小臣竊自嘉預奉柏梁讌

謝玄暉晚登三山還望京邑詩灞涘望長安河陽
視京縣白日麗飛甍參差皆可見餘霞散成綺澄
江淨如練喧鳥覆春洲雜英滿芳甸去矣方滯淫
懷哉罷歡宴佳期悵何許淚下如流霰有情知望
鄉誰能鬢不變

新林浦去城十八里玄暉有之宣城郡出新林浦
向板橋詩江路西南永歸流東北驚天際識歸舟
雲中辨江樹旅思倦搖搖孤遊昔已屢旣歡懷祿
情復協滄洲趣囂塵自茲隔賞心於此遇雖無玄

豹姿終隱南山霧

宋徐諼有華林北澗詩總長潭兮括遠源下沈溜
兮起輕泉迴溪峻兮曲沼阻衝波激兮瀨淺淺貫
九谷兮積靈芝飛清濤兮潔澄川

新亭在城西南十五里今石子岡處齊徐勉有昧
旦出新亭渚詩驅車凌早術山華映初日總轡且
徘徊復值清江謐杳靄楓樹林參差黃鳥匹氣物
宛如斯重以心期逸春堤一游衍終朝意殊悉謝
眺和云宛洛佳遨遊春色滿皇州結軫青郊路迴

轍滄江流日華川上動風光草際浮桃李成蹊逕
桑榆蔭道周東都已倣載言歸望綠疇

宋文帝登景陽樓詩崇堂臨萬雉曾樓跨九成瑤
軒籠翠幌組幙翳雲屏階上曉露潔林下夕風清
蔓藻嬛綠葉芳蘭媚紫莖極望周天險留察浹神
京交渠紛綺錯列植發華英

唐書樂志云石城有女子名莫愁善歌謠今石城
之西有莫愁湖亦一證也然樂府解題曰古歌亦
有莫愁女洛陽人與此不同豈有兩莫愁耶莫愁

樂云莫愁在何處莫愁石城西艇子打兩槳催送
莫愁來聞歡下揚州相送楚山頭探手抱腰看江
水斷不流觀石城西與下揚州二語爲金陵人無
疑

景定建康志言金陵有太保王祥墓當是導南渡
時奉之以來後子孫七十許人六朝史皆有其傳
此古今所未有固由太保兄弟盛德所貽然觀史
言王氏世居禁中里馬糞巷門風寬恕兄弟子姪
皆篤實謙和時號馬糞諸王爲長者且門中唯劉
真長王仲祖許玄度支道林諸人往來其能世濟
其美久而彌昌有以也夫

王右軍與謝萬書云頃東還修植桑果令盛敷榮
率諸子抱弱孫遊觀其間有一味之甘割而分之
以娛目前雖植德無殊邈猶欲教養子孫以敦厚
退讓或有輕薄庶令舉策數馬彷彿萬石之風觀
此王氏之家法亦可槩見今人動言江左風流若
以爲浮薄者然彼何足以知王謝哉

陶隱居有真蹟藏建陽徐閑中家今停雲館帖有

焦氏筆乘 卷之七
之云郭干村者在長隱山東數里仙人郭四朝初
至山種植於此郭干號因斯兆焉隱居華陽頌所
云郭干峙留岸姜巴亘遠蹤正指此也嘉靖中山
人郭第尋至其處以爲奇廣陵朱曰藩贈以詩塘
墻新綠影脩脩一笑能來郭四朝擬接土山開靖
室且支丹竈向踈寮扣舷慣愛池中戲相杵時聞
城上謠見說五遊還有待願因香茗結逍遙

謝公墩在冶城之尾冶城本吳王夫差冶鑄處宋
爲天慶觀今朝天宮鐵塔寺謝公墩一脉綿亘皆
其地也世說王右軍與謝太傅共登冶城謝悠然
遠想有高世之志故名謝公墩謝靈運撰征賦視
冶城而北屬懷文獻之悠揚指此也自景定建康
志言荆公雖有我屋公墩之句又云問樵樵不知
問牧牧不言意公亦自疑遂斷以父老相傳之言
爲無據不知我屋公墩已的有所指其言樵牧不
知特言舊事荒涼以寓其感慨云耳而豈謂非公
遺跡也哉李太白登冶城西北謝公墩詩序云此
墩卽晉太傅謝安與右軍王羲之同登處予將營

園其上故作是詩云冶城訪古迹猶有謝公墩憑
覽周地險高標謝人誼想像東山姿緬懷右軍言
白鷺映春洲青龍見朝暎地古雲物在臺傾禾黍
繁我來酌清波於此樹名園其言詳且晰矣太白
又在介甫之前卽世說與太白詩證之紛紛之疑
盡破亦何必鑿空指謝公他子孫爲說耶
沈約遷尚書令雖名位隆重而居處儉約嘗立宅
鍾山之下旣成劉杳贊之約報云惠以二贊詞采
妍富便覺此地十倍

吳隱之爲廣州刺史官罷並無還資籬垣仄陋妻
子寒露內外茆屋六間在金陵城東南五里
張文潛云予自金陵月堂謁蔣帝祠初出北門始
辨色行平野中時暮春人家桃李未謝西望城濠
水或流或絕多鷓鴣白鷺迤邐傍山風物天秀如
行錦繡圖畫中

鐘山最秀者屏風嶺巧石青林幽邃如畫在明慶
寺前山之東有八功德水在悟真庵又寶公塔西
二里有洗鉢池興國寺有道光泉以僧道光穿斲

得名宋熙泉近宋熙寺之側寺東山顛有定心石
下臨峭壁西百餘步有白蓮庵又北高峰絕頂有
一人泉僅容一勺挹之不竭皆山之勝處
齊立儒館於北郊命雷次宗居之次宗因開館於
雞籠山高帝嘗就以受禮及左氏春秋
竟陵王子良移居雞籠山下集四學士抄五經百
家爲四部要略千卷

陳軒金陵集有懷攝山十題曰白雲庵清風軒唐
公巖天開巖宴坐臺中峰澗明月臺品外泉醒石

磬石

宋謝朓七歲能屬文父莊遊土山使朓命篇攬筆
便就

謝公於土山營立樓館植林竹甚盛每攜中表子
姓往來遊集肴饌日費百金

湯山西接雲穴山湯泉出其下大小六處四時常
熱禽魚之類入者輒爛以煮豆穀終日不熟草木
濯之愈鮮茂

杜子美送許八拾遺歸江寧觀省詩結句看畫曾

魚氏筆乘 卷之七
二五
饑渴追蹤恨森茫虎頭金粟影神妙獨難忘自注
甫昔時嘗客遊此縣於許生處乞瓦官寺維摩圖
樣

銅山在江寧縣東七十里鮑昭過銅山掘黃精詩
云銅山晝深沈乳竇夜涓滴卽此句容北溧水西
各有銅山皆舊日采銅處

陳永定初王彬聚兵襄陽以窺臺城造黃龍舟千
艘忽西南風急張帆直下陳將侯瑱泊舟蕪湖卽
隨之戰於烈山之下用拍竿撞彬船遇之則破彬

擲火焚之風逆自焚遂大敗土人以瑱功甚盛故
名山曰烈山以祠之宋晁無咎有詩云山如浮玉
二峰立江似海門千頃開我欲此中成小隱莫教
山脚有船來

景定志吳赤烏四年鑿東渠名青溪通城北塹潮
溝洩玄武湖水南流接於秦淮及楊吳城金陵青
溪始分爲二在城外者自城濠合於淮今城東竹
橋西北接後湖者遺跡固在但城內者悉皆湮塞
惟上元縣治迤邐而西循府治東南出至府學墻

魚氏筆乘 卷之十
下皆青溪之舊曲通於秦淮溪舊有七橋晉郗僧
施泛舟青溪每溪一曲作詩一首謝益壽聞之曰
青溪中曲復何窮盡至趙宋僅存一曲耳節使馬
光祖浚而深廣之建先賢祠及諸亭館其上築堤
飛橋以便往來遊人汎舟於中自早至暮樂而忘
歸馬有詩人道青溪有九曲如今一曲僅能存江
家宅畔成花圃東府門前作菜園登閣自堪觀疊
嶂泛舟猶可醉芳樽料應當日皆無恙苕雪瀟湘
不足言

烏衣園有宋張杜柳梢青詞豔藉可喜燕里花深
鷺汀雲淡客夢江臯日日言歸淮山笑我塵鎖征
袍幾回把酒憑高闌干外魂飛暮濤只有南園一
番風雨過了櫻桃

郭文字文舉王茂弘築臺於冶城以處之今太一
殿卽書臺遺址嘗手探虎鯁茂弘問之對曰情由
想生不想卽無人無殺獸之心獸無害人之意

吳景伯登鳳皇臺沁園春詞再上高臺訪謫仙兮
仙何所之但石城西踞潮平白鷺浮圖南峙雲淡

魚氏筆苑 卷之十
鳥衣鳳鳥不來長安何處惟有碧梧三數枝興亡
事對江山休說誰是誰非庭花飄盡胭脂筭結綺
繁華能幾時問行人重向新亭揮淚何人更到別
墅圍碁笑拍欄杆功名未了寧肯綠簑尋釣磯深
深飲任玉山醉倒明月扶歸

白鷺亭東坡嘗題其柱王勝之龍圖守金陵一日
而移南郡東坡居士作長短句以贈之千古龍蟠
並虎踞從公一弔興亡處渺渺斜風吹細雨芳草
渡江南父老留公住公駕飛車凌彩霧紅鸞參乘

青鸞馭却訝此洲名白鷺非吾侶翩然欲下還飛
去荆公因作詩柱上題名客姓蘇江山清絕冠吳
都六花飛舞凭闌處一本天生卧雪圖

洪丞相邁云金陵之賞心白鷺杭漢汝陰之西湖
洪蜀永之西山嘉之蛾眉巴陵岳陽之樓黃之臨
臯揚之平山吳之蘇臺茂苑荆楚之雲夢滁之瑯
琊九江之庾樓皆延庚揖辛賓夕陽而導初月校
奇品勝於登臨爲宜

丁晉公典金陵陞辭真宗出八幅袁安臥雪圖付

魚氏筆乘 卷之十一
公曰卿到金陵選一絕景處張此圖丁遂張於賞
心亭圖乃唐周昉筆經十四太守雖極愛不敢取
後一人以畫蘆鴈易之去

何遜有登延祚閣詩閣在城內西北鐵塔寺中有
籀龍軒王荆公嘗讀書處今王集有正覺院籀龍
軒二詩據此我屋公墩之句正言自籀龍軒望謝
墩耳

南唐跨有江淮鳩集墳典特置學官濱秦淮開國
子監舊志在鎮淮橋北御街東里人呼國子監巷
吳赤烏八年使校尉陳勳作屯田發兵二萬鑿句
容中道至雲陽以通吳會船艦名破岡瀆爲十四
埭上七埭入延陵界下七埭入江寧界於是東郡
舟行不復經京江六朝因之隋平陳乃廢

李司徒建勳蔣山寺詩樓臺雖少景何深滿地青
苔勝布金松影晚留僧共坐水聲閒與客同尋清
涼會擬歸蓮社沈湎終須棄竹林長愛寄吟經案
上石林秋霽向千岑又題道林詩雖向鐘峰數寺
連就中奇勝出其間不教幽樹妨閒地別着高牕

向遠山蓮沼水從雙澗入客堂僧自九華還無因
得結香燈社空倚王門玷玉班

蘇東坡過清涼寺贈和長老詩代北初辭沒馬塵
江南來見臥雲人問禪不契前三語施佛空留丈
六身老去山林徒夢想雨餘鐘鼓更清新會須一
洗黃茆瘴未用深藏白氎巾又過淮入洛地多塵
舉扇西風欲污人但恠雲山不改色豈知江月解
分身安心有道年顏少遇物無情句法新送我長
蘆舟一葉笑看雪浪滿衣巾

劉後村清涼寺詩塔廟當年甲一方千層金碧萬
緇郎開山佛已成胡鬼住院僧猶說李王遺像有
塵龕壞壁斷碑無首立斜陽惟應駐馬坡頭月曾
見金輿納晚涼

寺創於南唐李後主山有後主暑
風亭并闌刻保大三年字近留題

者多誤

宋景文雞蹠集南齊棲霞寺大明法師好談論手
執松枝爲談枯

晉哀帝興寧二年詔移陶官於淮水北遂以南岸
空地施僧慧力造寺因以瓦官名之今驍騎衛倉

是其遺址南唐爲昇元寺登閣江山滿目最爲佳
勝處太白詩白浪高於瓦官閣正與今倉基所見
同近詔毀私創庵院集慶庵一點僧輒妄以瓦官
名其處因得幸免然於古跡毫無干涉也

李司徒建勳栖霞詩養花天氣近平分瘦馬來猷
白下門時色未開山意遠春容猶淡月華昏瑯琊
冷落存遺跡籬落稀疎帶舊村此地幾經人聚散
只今王謝獨名存

釋慧約姓婁少達妙理周顥素所欽服於所居鐘
山舊館作草堂寺以處顥仕於朝孔稚圭作北山
移文譏之卽此荆公詩周顥宅作阿蘭若婁約身
歸窳堵波蕙帳銅餅皆夢事條然陳迹翳烟蘿寺
今移栖霞山側

焦氏筆乘 卷之八

今蘇酈山側
隴宰散苑蕙荆風
蘇文鑑之唱此
山舊曾於草堂寺
蘇文鑑之唱此
隴宰散苑蕙荆風
蘇文鑑之唱此
隴宰散苑蕙荆風

焦氏筆乘續集卷八

秣陵焦竑弱侯輯

金陵舊事下

門人謝與棟吉甫
男焦尊生茂直
校

吳都賦橫塘查下邑屋隆夸夸古固反長干延屬飛薨
舛互吳大帝時自江口沿淮築堤謂之橫塘北接
柵塘蓋其時夾淮立柵自石頭南上十里至查浦
查浦上十里至新亭新亭南上十里至孫林孫林
南上十里至板橋查浦即查下也金陵鼎族聚居

焦氏筆乘 卷之八

橫塘查浦間樓閣壯麗天下莫比至趙宋猶然馬
制使光祖詩如今何處是橫塘在府城南淮兩旁
魏蜀兩都皆不似蓬萊三島足相方烏衣巷口排
金屋朱雀橋邊立粉墻有底繁華難說似何妨把
作畫圖張

茅山玉晨觀許長史舊宅有井色白而甘徐鼎臣
作銘云長史含道棲神九天人非邑改丹井存焉
射茲谷鮒冽彼寒泉分甘玉液流潤芝田我來自
西尋真紫陽若愛石樹如升魯堂敬刊翠琰永識
銀牀噫嗟後學挹此餘光

茅山華陽宮有陶隱居井歲久湮沒政和初道士
莊慎修索得之初去三尺許得瓦井闌雖破合之
尚全環刻大字先生丹陽陶仕齊奉朝請壬申歲
來山棲身高靜自號隱居同來弟子吳郡陸敬游
其次楊王吳戴陳許諸生供奉階宇湖熟潘邏及
遠近宗稟不可具記悠悠歷代詎勿識焉梁天監
三年八月十五日錢塘陳宣懋書又穿數丈獲一
圓石硯徑九寸許列十一趾滌之朱色粲然又得

魚氏筆乘 卷之八
銅鑪有柄若今之手鑪者今藏宮中

蕭頴士蓬池禊飲序云晉氏中朝始參燕胥之樂
江左宋齊又間以文詠風流遂遠鬱爲盛集蕭子
範家園三日賦有云聊潔新而濯故式東流之清
軌右瞻則青溪千仞北顧則龍盤秀出

汝南灣當秦淮曲折處齊陸慧曉清介自立張緒
目爲江東裴樂家於灣前張融自稱天地逸民牽
船住岸卜以鄰居劉瓛及弟璉二人并居其間水
有異味時共酌飲之馬光祖詩當時只號汝南灣

後有三人住此間自謂逸民須隱約並稱賢士想
高閒祇緣水味都殊異且欲鄰居數往還好事有
時相就飲不妨鐺脚對青山

宮苑記吳大帝遷都建鄴曰太初宮者卽長沙王
故府徙武昌宮室材瓦所繕也曰臺城宮省之所
寓也曰東府宰相之所居也曰西州諸王之所宅
也曰倉城儲蓄之所在也晉瑯琊王渡江因吳舊
都而居之宋齊以下間有改築其經畫皆仍吳舊
圖畫見聞志云艾宣金陵人工畫花竹翎毛孤標

刑致別是風規敗草荒榛尤長野趣又有昇州昭
厲慶工佛像尤長於觀音句容郝澄以丹青自樂
周文規能畫鬼神冕服車器人物昇元中命圖南
莊最爲精絕江寧沙門巨然畫烟嵐晚景當時稱
絕建康蔡潤善畫舟船及江湖水勢曹仲元工畫
佛道鬼神竺夢松工畫人物女子宮殿臺閣顧德
謙工畫人物劉道士工畫佛道鬼神

王祥字休徵舊志墓在江寧縣何城寺北祥累官
太保進爵爲公年八十五而終謚曰元弟覽累官

至大中大夫年七十三謚曰貞祥五子肇夏馥烈
芬肇始平太守馥上洛太守肇子俊守太子舍人
封永世侯俊子遐鬱林太守馥子根散騎郎覽六
子裁撫軍長史基治書御史會侍御史正尚書郎
彥治中護軍琛國子祭酒丞相導裁之子也世居
烏衣巷衣冠之盛爲江左第一

聖宋名畫錄開寶中王師伐金陵府藏悉充軍賞
有步卒李貴徑入佛廟得建康人王齊翰所畫十
六羅漢鬻於市富商劉元嗣以白金四百兩請售

之元嗣入都復質於相國寺普滿塔主清教處及元嗣往贖並爲所匿訟於京師時真宗方尹京按證其事清教辭屈乃出元畫真宗嘉歎各賜白金十兩釋之後十六日卽位名曰應運國寶羅漢藏於秘府

淳熙十一年溧陽倉斗子坐盜官米黥配而籍其家得草書二軸題云康申歲書其名權花押正如一劍之狀蓋鐘離翁也詞云露滴蘭芽玉滿畦閒拖象屐到峰西但令心似蓮花淨何必身將槁木

齊古塹細香紅樹老半峰殘雪白猿啼雖然不是桃源洞春至桃花亦滿蹊李粹白跋曰字畫放逸有翔龍舞鳳之勢脫去尋常蹊徑飄然神仙風度也真本藏建康府治軍資庫一作唐僧貫休詩見弘秀集

江表傳載吳大帝詔曰建康宮乃朕從京來所作將軍府寺耳材柱率細小今未復西可徙武昌宮材瓦更繕治之有司奏言武昌宮已二十八歲恐不堪用宜下所在更伐木治帝曰大禹以卑宮爲

美今軍事未已所在多賦損農武昌材自可用也
潮溝在金陵上元之西張子野長相思詞粉豔明
秋水盈柳樣纖柔花樣輕笑前雙靨生寒江平江
櫓鳴誰道潮溝非遠行回頭千里情

越用范蠡之謀盡有吳地將圖楚稱霸江淮乃築
城於長干里今秦淮南一里半廢越城是

或謂吳郡陸喜曰薛瑩於吳士爲第一乎喜曰瑩
在四五之間安得爲第一夫以孫皓無道沈默其
體潛而勿用者第一也避尊居卑祿以代耕者第

二也侃然體國執正不懼者第三也斟酌時宜時
獻微益者第四也溫恭修慎不爲諂首者第五也
過此以往不足復數故彼上士多淪沒而遠悔吝
中士有聲位而近禍殃觀瑩之處身本末又安得
爲第一乎

賈黃中知昇州府舍有一室封記俱全黃中啟之
得李氏珠寶數十櫃皆未著於籍者卽表上之上
曰非黃中則亡國之寶汚法害人矣賜錢三十萬
天禧中馬亮二知注寧府初亮將代夢舌上毛生

有僧解曰舌上毛生剃不得也當再任果如其言
隼旆如歸耄倪相慶林逋寄詩云金陵土著多蒙
賴分野三回見福星

光祿卿王隨知江寧會歲大饑轉運使移府發常
平倉米計口日給隨置不聽曰民饑由兼并閉糴
以邀高價耳乃大出官粟而私價遂平他郡計口
以糴者不能自足多流死

天聖四年江寧童子夏錫幼能爲詩試陽出身
昇州人邵必被差爲編修唐書官必言史出衆手
非是卒辭之

崇寧二年監司薦江寧府進士侍其瑀經行爲鄉
閭所推詔乘驛赴闕

石勒來攻建鄴楊威將軍紀瞻督諸軍討之勒退
河北帝鑄一鼎沈瓜步江中其鼎無文字乃龜形
茅山記曰秦始皇三十七年遊會稽還登句曲北
垂山埋白璧一雙深七尺李斯篆刻文云始皇聖
德平章江山巡狩蒼川勒銘素壁

蔣山本少林木晉令刺史罷還種松百株宋諸州

刺史罷職還者栽松三千株下至郡守各有差
散騎常侍劉劭經始鐘嶺之南以爲棲息聚石蓄
水朝士雅素者多從之遊

阮孝緒因母疾用藥須生人蓂相傳鐘山所出孝
緒躬歷幽險累日不獲忽一白鹿導之前行至一
所不見就求之果得

唐大曆中處士韋渠牟隱鐘山號遺名子顏魯公
題其所居之堂曰遺名先生三教會宗堂

朱元晦云岷山之脉其一支爲衡山者盡於九江
之西其一支又南而東度桂嶺者則包湘源而北
經潭袁之境以盡於廬阜其一支又南而東度大
庾嶺者則包彭蠡之源以北盡乎建康其一支則
又東包浙江之源北其首以盡會稽南其尾以盡
閩粵

唐地理志云江南道名山衡廬茅蔣

吳使薛珣聘蜀還帝問蜀政得失珣對曰蜀主暗
而不知其過臣下容身以求免罪入朝不聞正言
經野民皆菜色夫燕雀處堂自以爲安也窟決棟

焦氏筆乘 卷之八
焚而恬然不知禍之將至是之謂乎帝聞之慄然
吳人陳焦死埋六月更生穿土而出

愍帝建興四年玉卮見於臨安白玉麒麟神壘出
於江寧其文曰長壽萬年江寧縣名始見是年或
曰永嘉中置

晉大興三年創北湖築長堤以壅北山之水東自
覆舟山西至宣武城六里餘

張詠爲江南東路安撫使殿直范延貴押兵過金
陵詠問公途來曾見好官員否延貴以萍鄉邑宰

張希顏對詠曰何以知之延貴曰自入縣境橋道
完田野闢市無賭博更鼓分明以是知其必善政
也詠大笑曰希顏固善矣天使亦好官員也即日
同薦於朝希顏後爲發運使延貴閣門祗候皆爲
能吏

江南岸有山孤秀從江中仰望壁立峻絕表崧爲
郡嘗登之矚望焉其記云今自山南上至其嶺嶺
容十許人四面望諸山略盡其勢俯臨大江如縈
帶焉視舟如鳧鴈矣

袁崧嘗言江北多連山登之望江南諸山數十百重莫識其名高者千仞多奇形異勢自非烟霏雨霽不辨見此遠山矣余嘗往返十許過正可再見遠峰耳

紹興中上元令李闢之言本縣所管金陵鐘山慈仁三鄉實鄰大江田疇化爲水面二稅虛掛版籍乞除放從之

張孝祥奏秦淮之水流入府城分爲兩派正河自鎮淮新橋直注大江其一爲清溪自天津橋出柵寨門亦入於江緣淮柵寨地近爲有力者所得遂築斷清溪水口創爲花園以爲翫賞之地每水暴至則泛濫城內居民被害若訪古迹使清溪直通大江庶建康永無水患詔汪澈指定以聞澈言欲於西園依異時河道通柵門入江從之

南唐元宗性友愛弟景遂景達出處遊宴未嘗暫捨元日雪上召諸弟登樓展宴賦詩詩成賜李建勳建勳方會徐鉉張義方於溪亭卽時和進元帝召三人同入夜分方散景遂集名公圖其事

御容高冲古主之太弟以下侍臣法部絲竹周文
矩主之樓閣宮殿朱澄主之雪竹寒林董元主之
池沼禽魚徐崇嗣主之圖成無非絕筆侍臣屬詠
徐鉉爲前後序文多不載

裴礪傳竒會昌中有顏濬秀才遊瓦官寺遇陳宮
人同遊語濬曰今日偶此登臨爲惜高閣不久毀
除故來一別耳後數月其閣果因寺廢而毀

術士王生金陵人瞽而善聽聲時丁謂先罷叅知
政事知金陵一日車從出南門王於稠人中潛聽
其馬蹄聲大言於衆曰參政月中必召月餘果急
召歸覲再入中書踰歲真宗晏駕丁充山陵使時
王生至京師丁聞其來甚喜厚待之留宿書院俟
曉入朝俾聽馬蹄聲退語諸子曰蹄響有西行之
兆諸子責之曰爾知相公充山陵使乃有是說耶
王不對後一朝士問之曰蹄西去而無回聲丁果
罷相分司西京繼有崖州之命

江南中主時有北苑使董源善畫尤工秋嵐遠景
多寫江南真山不爲竒峭之筆其後建業僧巨然

祖述源法皆臻妙理大體源及巨然畫其用筆甚
草草近視之幾不類物象遠觀則景物粲然幽情
遠思如覩異境如源畫落照圖村落杳然深遠悉
是晚景遠峰之頂宛有返照之色此妙處也

僧皎然送履霜上人還金陵西山詩攜錫西山步
綠莎禪心未了奈情何湘宮水寺清秋夜月落風
悲松柏多

吳雲壑琚字居父留守建康高似孫爲徽倅道出
金陵投以詩曰四朝渥遇鬢微絲多少恩榮世不
知長樂花深春侍宴重華香暖夕論詩黃金羸滿
無心愛古錦囊歸有字竒一笑容陪珠履客看臨
古帖對梅枝公之客曰儲用項安世周師稷劉翰
王輝王明清晚得王大受輟子姪官授之凡游從
皆極一時之彥他無嗜好居近城與東樓平光皇
爲書扁以賜樓下設維摩榻酷愛古梅日臨鐘王
帖以爲課非其所心交者迹不至此故高詩及之
杜旗字伯高賦石頭城酹江月云江山如此是天
開萬古東南王氣一自髯孫橫短策坐使英雄鵲

起玉樹聲消金蓮影散多少傷心事千年遼鶴并
疑城郭非是當日萬駟雲屯潮生潮落處石頭孤
峙人笑褚淵今齒冷只有袁公不死斜日荒烟神
州何在欲墮新亭淚元龍老矣世間何限餘子
周晉仙名文璞宋淳熙間人題鍾山云往在秦淮
問六朝江頭只有女吹簫昭陽太極無行路歲歲
鶯黃上柳條

宋景濂學士有晚步清溪上詩溪色涵膏綠溶漾
正堪餐十步九還辟清芬襲肺肝渚牙旣戢戢岸
花亦粲粲潔漚近宜狎賁魴清可捫流念梁陳際
甲第繞其塽南澁綺錢結北津銅網繁倒景浸寒
曠蒸氣濕鉛丹有時作清遊肅舲輪軒尊泛爵溢
朱組遙筵列蟬冠荆倡逞妍曲秦豔發清彈唯恐
懸象墮不憂芳年單繁華隨逝水崇替起哀歎黃
鳥背人飛響入華林園

越王臺在長干里范蠡佐句踐與楚爭霸築城秦
淮之南臺卽越城故址也小說乃謂越女嫁江南
國主爲妃以其地卑濕遷越土築臺以居詩人因

魚氏筆乘 卷之八
有爲越臺曲者云玉顏如花越玉女自小嬌癡不
歌舞嫁作江南國主妃日夜思歸淚如雨江南江
北梅子黃潮頭夜漲秦淮江江邊雨多地卑濕旋
築高臺待曉粧千艘命載越中土喜見越人仍越
語人生脚踏鄉土難無復歸心越中去高臺何易
傾曲池亦復平越姬一去向千載不見此臺空有
名此詞人不根之語殊不足據

謝鯤風格高峻少所交納惟與族子靈運瞻曜洪
微並以文義賞會共宴處居在烏衣巷謂之烏衣
游鯤五言詩昔爲烏衣游戚戚皆子姪其地在秦

淮南

江淹嘗宿於冶亭夢一人自稱郭璞謂淹曰吾有
筆在公處多年可見還淹乃探懷中得五色筆一
以授之爾後爲詩絕無美句時謂之才盡冶亭卽
冶城又金陵有夢筆驛不知在何處

真誥秦時有士周太賓及巴陵侯姜叔茂者來往
句曲山下秦孝王時封侯今謂之姜巴路在小茅
山後通延陵

魚氏筆乘 卷之八
謝公思會稽東山於城東築土以擬之一名土山
營立樓館植林竹甚盛每攜中外子姪往來游集
肴饌日費百金沈約郊居賦臨巽隅今縱目卽堆
塚而流盼雖東山之培塿乃文靜之所宴指此
節使吳琚遊清溪有詞岸柳可藏鴉路轉溪斜忘
機鷗鷺滿汀沙咫尺鐘山迷望眼一片雲遮臨水
整烏紗鬢影蒼華酒闌却念在天涯幾日不來春
便晚開盡桃花

江寧浦在城南六十里荆公有江寧夾口詩五首

茅屋滄洲一酒旗午烟孤起隔林炊江清日暖蘆
花轉恰似春風柳絮時二月墮浮雲水捲空滄洲
夜泝五更風北山草木何由見夢盡春燈展轉中
三鐘山咫尺被雲埋何況高樓與北齋昨夜月明
江上夢逆隨潮水到秦淮四日西江口落征帆却
望城樓淚滿衫從此夢歸無別路破頭山北北山
南五落帆江口月黃昏小店無燈欲閉門半出岸
沙楓欲死繫船猶有去年痕
段成式云蔣山有應潮井在半山之間俗傳云與

焦氏筆乘 卷之八
江潮相應嘗有破船木板自井中出貞觀中有牧
兒汲水得杉板長八餘上有朱漆字曰吳赤烏二
年豫章王子駿之船

陳公堯咨泊舟三山有叟曰來午有大風舟行必
覆當謹避之翼日晴明同行舟皆離岸公託以事
未發日午黑雲起天末大風暴至折木飛砂怒濤
若山行舟皆溺公驚歎又見前叟曰某江之遊奕
將也公他日位宰相固當奉告公曰何以報德叟
曰吾本不求報貴人所至宜為護行願得金光明
經一部乘其力薄得遷職至京以金光明經三部
遣人至三山磯投之夢前叟曰本祈一部公賜以
三今連陞數職矣再拜而去

金城戍在上元金陵鄉王敦為瑯琊內史嘗鎮其
地後溫北伐經金城見曩所種柳皆十圍歎曰樹
猶如此人何以堪因攀枝執條泫然流涕

石城洞一名龍洞石頭西嶺下臨大江當嶄絕之
處有洞戶真誥云此小有洞天之南門也世呼為
龍洞口

青溪閣本梁江總故宅徐照詩葉脫林梢處處秋
壯懷易感更登樓日斜鐘阜烟凝碧霜落秦淮水
慢流人似仲宣思故國詩如杜老到夔州十年前
作金陵夢重撫闌干說舊遊

周益公賞心亭詩晉人誇新亭暇日輒高會中間
伯仁輩未免楚囚對江山猶古昔人物已曖昧東
郊今保釐翠華記行在佳麗壓淮楚追遊盛冠蓋
茲樓冠城雉于邁無小大令威雖不歸靈光故無
礙烟雲互明滅川郭相映帶當年烏衣遊此日思

勝槩從容直休沐登臨多慷慨幽懷忽軒豁細故
絕芥蒂已尋詩社盟更許食期戒佳賓常滿座好
語來天外舟移白鷺遠日送飛鳥快方種淵明菊
粗免監河貸一醉儻可期與君時倒載

米元章賞心亭詩晴新山色黛風縱蘆花雪盡日
倚闌干寒霄低細月

後山談叢云黃巢爲亂將攻金陵人解之曰王母
以攻也王名巢入金則鑠矣巢因自引去

金陵有樂官山南唐樂官所葬處曹景建有序云

南唐初下時諸將置酒將作樂樂人大慟殺之聚
瘞此山因名樂官山詩云城破轅門宴賞頻伶倫
執樂淚霑巾駢頭就死緣家國愧殺南歸結綬人
鐘山有一人泉釋覺範嘗同敦素沈宗師酌而飲
之賦一詩鐘山對吾戶春曉開烟鬟白雲峰頂泉
紺碧生微瀾經年未一酌對客愧在顏兩翁亦超
放瘦策容躋攀大千寄一瞬境靜情亦閑是時天
慘淡佳處多遺刪立談共嘲諛豪氣破天慳臨川
冰玉清風流繼東山茲遊適所願但恨無弓彎東
陽丘壑姿癡絕膽亦頑孤坐巉絕處掉頭不肯還
天風吹笑語響落千巖間歸來數清境但覺毛骨
寒從君乞秀句端爲刻爛斑

溫庭筠雞鳴埭曲云南朝天子射雉時銀河耿耿
星參差銅壺漏斷夢初覺寶馬塵高人未知魚躍
蓮東蕩宮沼濛濛御柳懸栖鳥紅粧萬戶鏡中春
碧樹一聲天下曉盤踞勢窮三百年朱方殺氣成
愁烟彗星拂地浪連海戰鼓渡江塵漲天繡龍畫
雉填宮井野火風驅燒九鼎殿巢江燕砌生蒿十

二金人霜炯炯芊眠平綠臺城基暖色春容荒古
陂寧知玉樹後庭曲留待野棠如雪枝

又有謝公墅歌朱雀航南繞香陌謝郎東墅連春
碧鳩眠高柳日方融綺榭飄飄紫庭客文楸方罨
花參差心陣未成星滿池四座無喧梧竹靜金蟬
玉柄俱持願對局含情見千里都城已得長蛇尾
江南王氣繫疎襟未許苻堅過淮水

張僧繇於金陵安樂寺畫四龍不點睛人問之答
曰點則飛去固請點之頃刻雷電作二龍乘雲騰
上其二不點者猶在畫之通神如此

貞觀初丹陽令王瓊調集遭黜瓊甚憤惋乃齋百
千詣茅山道士葉靈中求章奏問吉凶靈中年九
十矣強爲奏之其章隨香烟飛去縹渺不見食頃
墮地朱書其末云受金百兩折祿二年枉殺二人
死後處斷一歲瓊無疾暴卒

周輝清波雜誌云輝居建康春晚赴張德共會於
西園呼數輩爲侑酒酣忽有傳府命呼其人時張
安國開府方兩日其人旣去求自解之說衆謂但

焦氏筆乘 卷之八
以實告坐客駱適正卽席賦詩云花隨春盡覓無
痕尚續餘歡索侑尊一曲未終人已去西園燈火
欲黃昏今三十年西園賓主無一在者舊事無人
可共論爲之一嘆

王荆公墓在蔣山東三里與其子雱分昭穆而葬
紹聖初呂吉甫知金陵時待制孫君孚責知歸州
經從呂燕待之禮甚厚一日因報謁於清涼寺問
孫曾上荆公墳否蓋當時士大夫道金陵未有不
往者五十年前土人節序亦往致奠時之風俗如
此曾子開有上荆公墓詩見曲阜集

清波志云輝居建康春時借一二鄰曲至內後景
陽臺臺之下一尼庵少憇見若琉璃色一瓦甃徑
二尺許厚三四寸中空用以閣盆盜叩之鏗然有
聲尼云近墾地得之乃李後主用此引後湖水入
宮者又至白下門齊安院主僧曰近治地得一玉
杯已碎銀一錠上刻永定公主爲誌公和尚淨髮
之資一樣十錠行人問宮殿耕者得珠璣誠不吾
欺

輝憶年及冠從父執陳彥育序遊鐘山陳題三四
詩於八功德水庵之壁寒騎瘦馬度山腰目斷青
溪第一橋盡是帝王陵墓處野風荒草暝蕭蕭十
年塵土暗衣巾亂走江鄉一病身西第將軍成底
事北朝開府是何人止記其二陳句金人先人嘗
次其韻雄壓吳頭控楚腰千峰環拱冶城橋黃旗
紫蓋旋歸漢古剝淒涼尚號蕭北嶽經行匪濫巾
相陪來現隱淪身春蘿秋桂還吾輩白浪紅塵付
若人二十年後過之皆不存矣郗后化蟒之地鹿
苑院土人名蕭帝寺殿宇猶是梁時建

建康六朝故都葉石林少蘊居留日嘗命諸邑官
能文者搜訪古跡製圖經時石橋林敏若子邁主
上元簿考最詳多以荆公詩引證號上元古跡輝
嘗得其書後史志道侍郎修建康志宛轉借去志
成爲助良多

石林至新林因江寧尉林恪謁於道旁忽叩新林
之名林卽對乃王坦之倒執手板見桓溫之地大
喜曰不圖同寮中得一文士未幾以左傳托其點

抹其見賞識如此方欲薦用而林卒林開封人
建康創建府治石林委府僚伴圖再三不叶意一
旦杖策自往相視四顧指畫遂定儀門外列六位
以處倅貳職官迨六蜚臨幸以設廳為三省便廳
為樞密院六位為六部次及百司皆有攸處其他
政事精明人至今能道之

張忠定公詠真宗朝出守昇州集中有金陵郡齋
述懷一首傍人往往羨清塗野逸情懷亦自扶官
舍四邊多種竹潮溝一面近生蘆病嫌見客低徊

甚老覺臨官氣味麤不信浮名是身累有時閒
白髭鬚

金陵人物表

周	生於此	居於此	職於此	墓於此	祠於此	封於此
西漢			范蠡越上將 軍築越城	左伯桃 <small>溧水縣南</small> 羊角哀	羊左廟 <small>哀伯桃</small> 貞義女	劉敢丹陽侯 劉纒秣陵侯 劉欽溧陽侯 劉畢溧陽侯
東漢	史顥崇子 史茅顥子	嚴光結廬 溧水	潘乾為溧 陽長	史崇溧陽 許光句容	史祖廟崇 蔣帝廟好	史氏自崇 至澤世為 溧陽侯
漢	史洽茅子 史澤洽子	史崇世居 溧陽	蔣子文秣 陵尉			陶謙溧陽

侯

吳

史鉉澤子
史嵩崇裔
陶璜
朱治
朱然治子
朱績然子

許光居句容
是儀臺城
西張昭長干
北陸機秦淮
側

萬彧溧陽
南甘寧直瀆
山葛玄句容
西南
張婁侯
是尚書儀
周將軍瑜
韓當石城侯
潘璋溧陽侯
芮玄溧陽侯

晉

紀瞻
薛兼
張閻
許邁
陶回
王諒
樂道融
甘卓
許穆
葛洪

王導
謝安
紀瞻
並烏衣巷
郗鑒青溪
上謝尚與嚴
寺謝萬長樂
橋東

劉超句容令
顧昌曾勝
並建康令
諸葛恢臨南
沂令
王舒溧陽
令
阮裕溧陽
令
陶潛鎮軍
山簡覆舟
山之陰
王祥城西
謝安梅願
現祖遜顧榮
賀循紀瞻鄧
下壺冶城
攸周訪應詹
戴淵周顛司
衛玠新亭
馬承下壺郗
顏舍靖安
鑒陶侃溫嶠

宋

史萬壽
史爽
史光
史憲
史雅

郗鑒青溪上
參軍
謝尚興嚴寺
表瓌丹陽
謝萬長樂橋
令
東王僧虔馬
糞巷
謝玄土山下
吳隱之城東
許穆雷平山

紀瞻句容
庾亮劉超
鍾
衛玠新亭
雅桓彝陸
驥
顏舍靖安
孔愉孔坦
何
道旁
充蔡謨顏舍
史萬壽史
孫綽王羲之
爽史光史
王述王彪之
憲史推呂
王坦之
桓冲
游呂貞馬
謝石謝玄
陶
訓並溧陽
潛並附元帝
廟

雷次宗鐘
鮑昭秣陵
山西巘
周續之鐘
顧憲之劉
秀之張永
檀道濟青
陸徽江乘
溪北
之沈浚並
何尚之南
建康令
鄭襲江乘
澗寺側

謝濤建康
雷徵君款
東土山
謝惠連上
元縣

鮑氏筆乘

卷之八

二五

齊

謝幾卿白令
楊之石井藏壽臨沂
周捨蔣山令

周顥鐘山
褚球溧陽
西巖
劉瓛檀橋
王擒王沈
並秣陵令

明僧紹攝
劉貞簡
陶侍讀

諸葛頴
劉係宗
陶弘景
寶誌東陽
鎮

蕭坦之府
城東
陶弘景茅
山
劉元明劉
係宗賀道
方鐘阮蕭
懷蕭誕並
建康令

梁

紀少瑜
陶子鏘
陶季直
丁咸序

朱吳
沈約
伏曼容
伏挺
范雲

樂法才傅
葛府句容
昭明太子統
杜龕溧陽
侯
翽謝挺孔
陶弘景句
容雷平
周弘正

陳

馬樞茅山
周韶方山
江總青溪令
駱文牙土
蕭引張雉
才阮翽並
孫瑒青溪
建康令

王僧辯方
山下

張松
朱異
韋載
淳于量
盧郢

孟智臨沂
縣

唐

許叔牙
張常洧
崔芋
劉鄴
史務滋
史寔

韋渠牟
鐘輻
並居鐘山

王通竇叔
向白季康
蘇鄉
陸該岑仲
史務滋溧
休並溧水
陽縣
柳均李寂

顏尚書來
顏尚書
李翰林白
史務滋溧
陽縣子

杜伏威吳王
顏真卿丹
陽縣子

焦氏筆乘

卷之八

三十三

許淹

鄭宴並溧

南唐

宋朝

陽令 楊於陵句 容簿 宋隣 並溧陽尉 王昌齡江

張詠石頭 李司徒 潘內史 佑

李建勳鐘山 康仁傑溧 陽簿 孫晟鳳臺山 徐鉉攝山 宋齊丘鎮淮 橋北

高越攝山 楊邦又南門外 楊忠襄 邦又 姚察使興

潘温之 錢時敏 李朝正 錢周材

閻彥昭 呂宣問 並居溧陽 王安石半

曹彬昇州 行營統帥 李及昇州 觀察推官

管元善下 攝鎮周元公 敦願 陽男

錢時敏 溧 陽伯 李朝正 溧

史思賢

山寺

程顥上元

楊宗開 鍾山 鄉 程純公 顥

刁衍

蔡寬夫在

主簿 虞允文 督

葉祖公 宣 鄉 程正公 願

邵必

劉岑溧陽

府參謀 王德鍾 山 李 李恭惠公 及

錢周材 燕 山 張忠定公 詠

李華

陳巳竹街

張拭 督府 邈 青龍 山 王 包孝肅公 拯

王德鍾 山 李 李恭惠公 及

錢戩

汪膠 汪瀛

機宜 端修 溧 陽 南 鄭介公 俠

新武岡 山 錢 楊文靖公 時

潘祺

並笄橋

馬之純 運 管

端修 溧 陽 南 鄭介公 俠

吳柔勝

洪遜

張保鳳 臺 鄉 李 文 定 公 勉

趙彥 金陵 鄉 傅 獻 簡 公 堯 俞

朱舜庸

張孝祥 上元

呂文穆公 願 浩

張保鳳 臺 鄉 李 莊 簡 公 光

趙士岍

容 張 忠 獻 公 俊

崔敦詩 溧 陽 張 宣 公 拭

趙士岍 容 張 忠 獻 公 俊

南李朝正

溧 呂 忠 肅 公

張 宣 公 拭

趙士岍 容 張 忠 獻 公 俊

陽北董平

溧 楊 忠 襄 公 邦 又

陽北董平 溧 楊 忠 襄 公 邦 又

陽北董平 溧 楊 忠 襄 公 邦 又


陽北李處全

朱文公

朱文公

陽北李處全 朱文公

焦氏筆乘續集卷之八



焦氏筆乘續集卷之八

二十五

溧水王端朝 趙忠簡公

溧水程孫清 吳正肅公 桑慶

涼寺

陳正獻公

黃尚書 度

劉忠肅公 珙

馬少師 之純

丘樞密

真文忠公 德秀

